

PRIMERA CARTA DEL APOSTOL SAN PABLO A LOS CORINTIOS

1 ¹Wejrqui Pablutča. Jesucristuž cuchanžquita apostoltča. Jalla nuž Yoozqui munchičha, wejr apóstol puestuquiz uchi. Wejrqui Sóstenes cjita jilžtan tii cartal cjiržčuča ančhuc criichi žoñinacžquin. ²Ančhucqui Corinto wajtchiz criichi jilanacčhucča. Werar Yooz iclizziz žoñinacčhucča. Jesucristuž cjen Yoozqui ančhuc t'akziča niiz zuma kamañchiz cjisjapa. Jalla nijapauqui Yoozqui ančhuc kjawziča. Nižaza Yoozqui tjapa criichi žoñinaca kjawziča niiz zuma kamañchiz cjisjapa. Ančhucatan parti criichi žoñinacžtan Jesucristo Jiliržquin sirwiča. Jesucristo Jilirž mantuquizza ninacami, nižaza učhummi. ³Učhum Yooz Ejpžtan Jesucristo Jiliržtan, ančhucaquiz zumaj yanapla. Nižaza ančhucžtajapa walikaj kamkatla.

YOOZQUI ŽOÑINACŽQUIZ YANAPCHIČHA

⁴Jesucristuž cjen Yoozqui ančhucaquiz ancha okziča. Ančhucaž okžtaž cjen tirapan Yoozquin gracias cjian chiyučha. ⁵Jesucristuž cjen Yoozqui ančhucaquiz zumpacha yanapchiča, Yooz puntu zuma zizajo, nižaza Yooz taku zumajaljayajo.

⁶Wejrnacaž Jesucristuž puntuquiztan paljaytan ančhucqui persun kuzquiz zumpacha catokchinčhucča. ⁷Jalla nižtiquiztan ančhucqui tjapaman Yooziž tjaata kamañchizza. Jalla nuž kamcan, Jesucristo Jiliriz tjonz tjuñi tjewža ančhucqui. ⁸Jesucristo Jiliripacha ančhucaquiz tjurt'iñi kuzziz cjiskataquiča niiz tjonz tjuñicama. Tjurt'iñi kuzziz tjewznan, Jesucristo Jiliriz tjonz tjuñquiziqui ančhuca quintrana añaž jecmi kjaž cjesača. Yoozqui ančhuca ujnaca pertunchičha Jesucristuž cjen. ⁹Nižaza ančhuc kjawziča niiz Majch Jesucristo Jiliržtan tsjii kuzziz cjeajajo. Nižaza Yoozza niiz kjawžta taku cumpliñiqui. Niiz tawkcama ančhucaquiz cwiataquiča Jesucristuž tjonz tjuñicama.

T'AKA T'AKA CH'AASSIČHA

¹⁰Jilanaca cullaquinaca, učhum Jesucristo Jilirž tjuuquiz ančhucaquiz rocuča, porapat tsjii kuzziz cjeajajo, nižaza ana pjali cjeajajo. Tsjii kuzziz cjen tsjii pinsamintuchiz cjis waquiziča. ¹¹Wejt jilanaca cullaquinaca, tsjii kjaž žoñinacqui Cloé famill žoñinacžquiztan wejtquiz quint'ichiča,

ančhucpora ch'aasiñchucquiča, jalla nii. ¹²Ch'aascan, t'aka t'aka chiichiñchucquiča, tuž cjican: “Wejrtča Pabluž t'akquiztanqui”. Tsjiizti cjiñizakazquiča: “Wejrtča Apolos t'akquiztanqui”. Tsjiizti cjiñizakazquiča: “Wejrtča Pedruž t'akquiztanqui”. Yekjapanacazti cjiñizakazquiča: “Wejrtča Cristuž t'akquiztanqui”. Jalla nužupan ančhucqui ch'aasiñchucquiča.

¹³Nonžna ančhucqui. Cristuqui anača t'aka t'aka. Ančuca laycu wejrqui anača cruzquiz ch'awctaqui. Nižaza wejt tjuquiz anača bautistaqui, wejt t'akquiz cjisjapa. ¹⁴Crispo, nižaza Gayo, jalla ninaca bautissinča. Walizat ana iya bautistučhaja. Jalla nižtiquiztan Yoozquin gracias cjican chiyuča.

¹⁵Nižaza wejt tjuu ana waytasača, “Pabluqui wejr bautissinča”, cjicanaqui.

¹⁶Aaa, tsjiilla wejr tjazinča; Estéfnas familia zakaz bautissinča. Anal iya jec bautistac cjuñuča.

¹⁷Cristuqui anača wejr bautisajo mantižquichi. Antis liwriiñi Yooz taku paljayajo mantižquichiča. Jalla nuž Yooz taku paljaycan wejrqui anača chawjc takunaca chiichintqui. Chawjc takunaca chiitasaz niiqui, wejtquiz kuz tjaatasacha. Jalla nižtiquiztan ančhucqui anaž učum laycu conta Jesucristužquiz tjapa kuztan cjitasacha. Nižaza Jesucristužquin tjapa kuz ana criitasacha.

JESUCRISTO CRUZQUIZ

CH'AWCTA PUNTU

¹⁸Jesucristuqui cruzquiz ch'awctatača. Jalla nii puntu paljaytiquiztan infiernuquin ojknī žoñinacacqui zumzu takunacaztakaz nayča. Liwriita, arajpachquin ojknī žoñinacazti Yooz takupanž nayča. Nii

Yooz taku paljaytaž cjen, Yoozqui niž azi tjeeža. ¹⁹Cjijrta Yooz takuqui tuž cjiča:

“Yoozqui tjeeznaquiča, ana criichi žoñinacaz ziztaqui inakazza, jalla nii. Nižaza Yoozqui tjeeznaquiča, ana criichi žoñinacaz intintitaqui tsjii kjutñiča, jalla nii”.

²⁰Nonžna. Chawjc taku chiñi žoñinacami, judío cuzturumpinac puntu tjaajiñi žoñinacami, nižaza partir puntu parliñi žoñinacami, jalla ninacacqui inakazza; Yooz puntuquiztan ana zizñinacacha. Jalla nuž tjeeziča Yoozqui; ninacž takunacami pinsitanacami zumzukazza. ²¹Tii muntuquiz žejlñi žoñinacacqui persun kuzquiz pinsican anapan Yooz pajasacha. Jalla nuž Yoozqui munchiča. ¿Jaknužž žoñinacacqui Yooz pajasajo? Jalla tižtača. Wejrnacqui Jesucristuž puntuquiztan paljayuča. Nii paljayta taku catokžcu žoñinacacqui werar Yooz pajasacha. Nižaza liwriita cjesacha. Ana criichi žoñinacacqui nii liwriiñi taku zumzu takužtakaz nayča. Jalla nuž ninacaz zumzu taku nayanami, Yoozqui munča, paljayta Yooz taku crižcu, žoñinacacqui liwriita cjequiča, nii.

²²Judío wajtchiz ana criichi žoñinacacqui milajrunacakaz pecča. Griego wajtchiz ana criichi žoñinacazti ninacaz pinsita jarukaz liwriita cjis pecča. ²³Ana walipanča nižta kuzziz žoñinacacqui. Jesucristuqui ticziča, žoñinaca ujquiztan liwriizjapa. Jalla nii Jesucristuž puntuquiztan wejrnacqui paljayuča, žoñinaca liwriita cjeyajo. Pero wejrnacaz Jesucristuž ticžta puntu paljaytiquiztan, Judío wajtchiz žoñinacacqui ana criiz pecča, “¿Kjažt ničiha liwriiñi cjesajo?” cjicanaqui. Parti žoñinacazti

wejrnaçaž paljayta takunaca nonžcu zumzu takužtakaz nayčha. Pero lijitum liwriiñi takupančha. ²⁴Jakzilta Judío wajtchiz žoñinacami yekja wajtchiz žoñinacami Yooziž kjawžta nonžaja, jalla ninacaqui Jesucristuž puntu takunaca zumaž nayčha. Nižaza Yooz taku nayčha, walja zizñiž taku, nii. Nižaza Jesucristuž cjen liwriiñi Yooz aziž pajcha nii Yooziž kjawžta nonžni žoñinacaqui. ²⁵Ana criichi žoñinacazti Yooz taku zumzu takužtakaz nayčha. Pero Yooz takuqui tsjan zumačha tjapa zizñi žoñinacž tawkquiztanami. Nižaza Yoozqui žoñinaca ujquiztan liwriizjapa juc'ant azzizza čhjul žoñinacžquiztanami. Cruzquiz ch'awctaž cjen Cristo ana azziztakaz nayčha ana criichi žoñinacaqui. Pero cruzquiz ch'awctiquiztan Cristuqui žoñinaca ujquiztan liwriyasačha. Ana criichi žoñinacaqui persun aztan anaž liwriyasačha. Cristupankazza liwriiñi azzizza.

YOOZIŽ KJAWŽTA ŽOÑINACA

²⁶Jilanaca, cullaquinaca, ančhucž cjuñzna. Yoozqui ančhuc kjawzičha. Jalla nii kjawžta oraqui jila parti ančhucaquiztan ana zizñi žoñinacatačha tii muntuquiz žejlñi žoñinacž yujcquiziqui. Nižaza ana mantiñi žoñinacatačha. Nižaza zuma rispitta familianacquiztan anatačha jila parti ančhucqui. ²⁷Yoozqui ančhuc illzičha ana zizñi žoñinaca cjenami. Nuž munčha ana criichi zizñi žoñinaca azkatsjapa ultimquiziqui. Nižaza Yoozqui ančhuc illzičha ana mantiñi žoñinaca cjenami. Nuž munčha ana criichi mantiñi žoñinaca azkatsjapa. ²⁸Nižaza Yoozqui ana rispitta nižaza iñarta žoñinaca illzičha, liwriizjapa. Nii žoñinacž puntuquiztan tii muntuquiz ana criichi žoñinacaqui

cjiñičha, “Ana čhjuljapa sirwičha”, cjican cjiñičha. Pero ultimquiziqui iñarta žoñinacaž liwriitiquiztan ana criichi rispitta žoñinacaqui inakaz cjiskattaž cjequičha. ²⁹Jalla nuž Yoozqui žoñinaca illz munchičha, niiž yujcquiz anaž jecmi mitarasi kuzziz cjejajo. ³⁰Yoozqui Jesucristuž cjen ančhucaquiz tsjii ew kamañchiz cjiskatchičha. Nižaza Jesucristuqui učumnacaquiz Yooz zuma pinsitanaca tjeezičha. Jesucristuž cjen učumqui zuma cjissičha Yooz yujcquiziqui. Nižaza Jesucristuž cjen učumqui Yooz kuzcama kamčha. Nižaza ultimquiziqui tjapa ana walinacquiztanami liwriitaž cjequičha učumqui. Jalla nužučha Yooz zuma pinsitanacaqui učumnacaltajapaqui. ³¹Jalla nižtiquiztan cijirta Yooz takuqui tuž cjičha: “Jakziltat honora waytiz pecčhaja, persunpachquiziqui honora anaj waytila, antis mañtiñi Yoozquikaz honoraj waytila”.

YOOZ TAKU PALJAYZ PUNTU

2 ¹Jilanaca, cullaquinaca, wejrqui ančhucaquiz liwriiñi Yooz taku paljayi tjonchinčha. Jalla nuž paljaycan ana chawjc tawkžtan paljaychinčha, tsjii walja zizñi žoñižtakazzi. ²Ančhucatan želan, Jesucristuž puntuquiztan nižaza Jesucristuž ticžta puntuquiztan jalla niipanikazza weriž paljaytaqui. Jalla nuž wejrqui persun kuzquiz tantiichinčha, ima ančhucaquiz tjoncan. ³Ančhucatan žejlcan, wejrqui humilde kuzziztačha, nižaza Yooz eksni kuzziztačha. ⁴Ančhucaquiz Yooz taku paljaycan ana chawjc tawkžtan atips pequiñtačha, tsjii walja zizñi žoñižtakaz. Pero paljayan, Espiritu Santučha niiž aztan ančhuca kuznaca atipchiqui, Jesucristužquin criyajo.

⁵Yooz aziž tjeežtiquiztan ančhucaquiz criiskatz pecatuča. Ana chawjc taku paljaytiquiztan ančhucaquiz criiskatz pecatuča.

YOOZ PUNTUQUIZTAN INTINTAZ PUNTU

⁶Pero tsjii tsjii Yooz puntunacaqui ch'amača intintazqui. Jalla nii puntunacazakaz tjaajinz pecuča. Pero walja Yooz kuzcama kamñi criichi žoñinacakaz nii puntunaca intintazasača. Jalla nii Yooz puntunacaqui anaž tii muntuquiz kamñi žoñinacž kuzquiz pinsitiquiztan tjonča. Nižaza anaž tii muntuquiz mantiñi jilirnacžquiztan tjonča. Jalla ninacaqui kataquiča, ninacaž pinsitanacžtanpacha. ⁷Ima tii muntu paacan Yoozqui persun kuzquiz pinsichiča, jaknužt žoñinaca liwriyačhaja, jalla nii. Ažk watanaca Yoozqui nii liwriiñi puntu ana kjanapacha intintazkatchiča žoñinacžquiz. Jaziqui tii timpuquizkaz Yoozqui intintazkatča, učhum nižtan wiñaya kamzjapa. Yoozpachača liwriiñi puntuquiztan tjaajinchiqui wejtquiziqui. Jalla nii tjaajinta kjanzt'uča. ⁸Tii timpuquiz mantiñi žoñinacžquiztan anaž jecmi liwriiñi Yooz pinsita intintazziča. Intintaztasaz niiqui zuma honorchiz Jesucristo Jiliri anaž cruzquiz ch'awctasača ninacaqui. ⁹Cjirta Yooz takuqui tuž cjiča:

“Yoozqui zumanaca tjaczinchiča nižquin sirwiñi žoñinacžtajapa. Nii Yooz tjaczinta zumanacača anaž jecmi cherchi, nižaza anaž jecmi nonzi, nižaza anaž jecmi persun kuzquiz tantiyi atchiqui”.

¹⁰Anzimi Yoozqui niž zumanaca Espiritu Santuž cjen učhumnacaquiz intintazkatchiča. Espiritu Santuqui

Yooz puntuquiztan zumpacha intintazza, tjapa Yooz puntumi. Jalla nižtiquiztan učhumnacaquiz intintazkatasacha.

¹¹Žoñinacaqui persun kuzquiz persun pinsitanacami zizza. Yekja žoñiqui ultimu ana zizza. Jalla nižta irata Yooz Espiritu Santuqui Yooz Ejpž pinsitanacami zizza. Ana čjul žoñimi Yooz pinsitanaca zizi atasača, ¹²Yoozqui učhum kuznacquiz niž persun Espiritu Santo luzkatchiča, niž persun pinsita intintazkatajo. Ana criichi žoñž kuzqui Yooz pinsitanaca anapan intintazkati atasača. Jalla nižta kuz učhumnacaltaqui ana žejlča. ¹³Wejrnacqui Yooz puntu intintazcu, ančhucaquiz Yooz pinsitanaca tjaajinchinča. Žoñiž tjaajinta jaru nižaza zizñi žoñž chawjc tawk jaru anal tjaajnuča. Pero Yooz Espiritu Santuž tjaajinta jaru, jalla niil tjaajnuča. Jaziqui Yooz pinsitanaca tjaajnuča Espiritu Santuž irpita criichinacžquin.

¹⁴Jakzilta žoñit ana Yooz Espiritu Santuž irpitažlaj niiqui, Espiritu Santuž tjaajintanaca anaž catokča. Zumzu tjaajintanacažtakaz nayča. Jalla nižtiquiztan ana Espiritu Santuchiz žoñinacaqui anapanž Yooz tjaajintanaca intintazasača. Yooz Espiritu Santuž irpita žoñinacapankaz Yooz puntu tjaajintanaca intintazasača. ¹⁵Espiritu Santuž irpita žoñinacaqui tjapa tjaajintanaca tantiyasača, Yoozquiztan tjonñi taku cjicu, už žoñžquiztan tjonñi taku cjicu, jalla nii. ¿Pero ana Espiritu Santuž irpita žoñinacaqui Espiritu Santuž irpita žoñž taku ana tantiyasača, nižaza criichi žoñinacžquiz Yooz puntu ana tjaajnasacha? ¿Kjažtiquiztan nižta cjesajo? ¹⁶Yoozqui niž Espiritu Santuž cjen učhumnacaquiz Cristuž

pinsitanaca tjaajža. Jaziqui zizza. Cjijrta Yooz takuqui, tuž cjiča:

“Anaž jecmi persun kuzquiztan Yooz pinsitanaca zizasača. Jaziqui anaž jecmi Yoozquiz tjaajnasasča”.

ANA CRIICHI ŽOÑINACAŽTAKAZ ANAČHA KAMZQUI

3 ¹ Jilanaca, cullaquinaca, wejrqui ančhucacuz tjapa Yooz puntu imazil tjaajžni atuča. Ančhucui imazi zuma intintazasača. Cristužquiz criichi cjenami Yooz Espíritu Santuž tjaajinta jaru ana zuma kamiñchucča. Persun kuzcama kamiñchucča, kolta ocjalanacažtakaz. ² Jalla nižtiquiztan wejrqui Cristuž puntuquiztan tsjii kjaž tjaajintanacaz ančhucacuz tjaajinchinča. Jaknužt tsjii wawaqui lichicča, nižaza anaž čheriqui luli atča, jalla niža irataž ančhucui. Imazi Yooz tawk čheri intintazasača. Imaziča Yooz tawk čheri lujlzuinaqui ančhucui. ³ ¿Kjažtiquiztan nižtajo? Ančhucča ana criichi žoñinacažtakazqui. Ančhucpora quintras pequiñchucča, nižaza ch'aas pequiñchucča, nižaza pjali cjičiz pequiñchucča. Jalla nuž anawali kamcan iyaziča Yoozquin zuma sirwiñinacchucui. Nuž anawali kamcan, ana criichi žoñinacažtakazza. ⁴ Yekjapanacui ančhucacuztan cjiča, “Wejrqui Pabluž t'akquiztanča”. Yekjapanacazti cjiča, “Wejrqui Apolos t'akquiztanča”. Jalla nuž čichiican ana criichi žoñinacažtakaz kamča.

YOOZ TAKU TJAAJINACŽ PUNTU

⁵ ¿Ject Apolosjo? ¿Ject Pablojo? Wejrnacaz Yooz taku paljaychiž cjen ančhucui Jesucristužquin criichinčhucča. Wejrnacui Yoozquin sirwiñkaztča. Yoozqui zapa mayniž wejtnacacuz sirwiz

langz tjaachiča. ⁶ Jalla nižtiquiztan Yooz taku paljaychinča, tsjii zkál čhacui kalltažokazzi. Wiruñacui Apolosqui ančhucacuz iya Yooz taku paljaychizakazza, jaknužt zkalcuz kjaztan jawiyaz, jalla niža. Ultimquiziqui Yoozpachača zuma kamañchiz ančhucacuz cjiskatchiqui, tsjii zuma zkalažtakaz.

⁷ Jalla nižtiquiztan nii čhjacñimi nii jawiñimi anaž čhjulumi. Yoozpanča chekanaqui. Yoozqui žoñinacž kuzquiz langža, tsjii čhjacča žkalažtakaz zuma pakzjapa. ⁸ Čhjacñimi jawiñimi tsjiikazza ninacacui. Yoozqui zapa maynižquiz pacaquičha niž langztiquiztan jama. ⁹ Wejrnacui Yooztajapa langžni mazinactča. Ančhucui Yooz langža yok cuntiçhucča. Nižaza ančhucui Yooz kjuyta kjuya cuntiçhucča.

YOOZTAJAPA LANGZ PUNTU

¹⁰ Yoozqui niž kuzcama wejr apóstol puestuquiz utchiča. Jalla nekztan Yooz taku paljaychinča, žoñinaca Jesucristužquin criyajo. Wejrqui kjuya kjuyñi maestružtakaztča. Yooz kjuy simintu langzinča. Nekztan Yooziž tjaata langzquiztan jama yekjapaqui Yooz kjuya pirkichiča. Weriz kalltita kjuy simintuntuñ jakziltat pirkachaja, zumpachaž pirkiz waquiziča. ¹¹ Wejrqui Jesucristuž puntuquiztanpankaz tjaajinchinča. Jalla nii tjaajintaqui Yooz kjuy simintužtakazza. Tsjemat simintuqui anača Yooz kjuyjapaqui. ¹² Nii Yooz kjuy simintuntuñ punta punta pirkitamiz cjesača. Koržtan, paaztan, zuma mazačtan, jalla ninacžtan pirkitaž cjesača. Nižaza pirkitaž zakaz cjesača tabližtan, cañtan, pjitžtan jalla ninacžtan. ¹³ Pero zapa mayniž langžaqui kjanapacha tjeežtaž

cjequiĉha Yooz pjalz tjuŋquiziqui. Yoozqui uĵtanŋtakaz tankataquiĉha. Nii uĵtan zapa mayniĵ langĵta yatizinskataquiĉha, zuma langĵta, ana zuma langĵta, jalla nii. ¹⁴ Jakziltiĵ langĵtat uĵtan tankattiquiztan tjuraĉhaja, jalla niiqui zuma pactaĵ cjequiĉha. ¹⁵ Jakziltiĵ langĵtat ujsnaĉhaja, jalla niiqui ana pactaĵ cjequiĉha. Pero nii ŝoŋŷ wirakaz infiernuquiztan liwriita cjequiĉha, niĵ langĵta pertissi cjenami.

CRIICHI ŽOŇINACAQUI YOOZ TIMPLU CUNTAĈHA

¹⁶ Anĉhucqui Yooz timplu cuntaĉha. Yooz Espiritu Santuqui anĉhuca kuznacquiz kamĉha. ¿Jalla nii ana ziz anĉhucjo? ¹⁷ Yooz timpluqui Yooztajapapanĉha. Anĉhucpachaĉha Yooz timpluĉhucqui. Jalla niĵtiquiztan jakziltat anĉhuc akaĉhaja, nii anĉhuc akŋi ŝoŋiqui zakaz akta cjequiĉha; Yooziĵ castictaĵ cjequiĉha.

ANA CRIICHI ŽOŇINACŽ ZIZTAQUI

¹⁸ Anĉhucqui anaĵ jecĵquizmi incallskata. Jakziltat anĉhucaquiztan ŝoŇinacĵ tjaajintanaca zuma zizŋiĵlaja, jalla niiqui nii tjaajintanacĵquiz anaĉha kuz tjaazqui. Pero Yooz puntuquiztan tjaajintanacĵquizkaz kuz tjaaz waquiziĉha, nekztan lijitum zizŋi ŝoŇi cjequiĉha. ¹⁹ ŝoŇŷ kuzquiztan ziztaqui zumzu ziztaĵtakazza Yooz yujcquiziqui. Cĵjrta Yooz takuqui tuĵ cĵiĉha: “Jakzilta ŝoŇit ŝoŇiĵ pinsita jarukaz kamĉhaj niiqui, jalla niĵta kamtiquiztan Yooziĵ tantaĵ cjequiĉha, casticta cĵisjapa”. ²⁰ Niĵaza cĵjrta Yooz takuqui, tuĵ cĵiĉha: “Tjapa ana criichi ŝoŇinacĵ pinsitanaca inakazza. Jalla nii zizza Yooz Jiliriqui”. ²¹ Jaziqui anaĉha ŝoŇŷ kuzquiztan tjaajintaqui kuzquiz sint'izqui, “Jalla nii ŝoŇiqui

zumaĵ tjaajinĉha”, cĵicanaqui. Yoozqui tjapa anĉhucaquiz tjapa zumanaca tjaaĉha. ²² Tjappachaĉha anĉhucaltaqui, Pablumi, Apolosmi, Pedrumi, tii muntuquiz ŝejlŋimi, ŝetimi, ticzmi, tii anzta ŝejlŋimi, tii jazta ŝejlŋimi, tjappacha anĉhucaltaĉha, Yoozquin sirwiz yanapzjapa. ²³ Niĵaza anĉhucĉha Cristuĵtajapaqui. Niĵaza Cristuĉha Yooz Ejpĵtajapaqui.

YOOZ SIRWIZ PUNTU

4 ¹ Wejrnacqui Yooz sirwiŋi ŝoŇinacakaztĉha. Wejrnacaĵ Yooz sirwan, Yoozqui wejtnacaciz niĵ tuquita chjojzaka pinsitanaca tjaajinĉiĉha, parti ŝoŇinacĵquiz tjaajnajo. Jalla nuĵ anĉhucqui wejtnaca puntuquiztan pinsiz waquiziĉha. ² Jakziltiĵquiz Yoozqui tjaajinĉhaja, jalla nii tjaajintacama parti ŝoŇinacĵquiz tjaajinstanĉha nii ŝoŇiqui. Jalla nuĵupan waquiziĉha. ³ Weriĵ tjaajintaqui yatisinĵtaĵ cjequiĉha. Pero anĉhucqui weriĵ tjaajinta yatisinznaquiĵ niiqui, ĉĵjul ŝoŇimi weriĵ tjaajinta yatisinznaquiĵ niiqui, wejtquiz anaĵ importiĉha. Werjpachami ultimu ana yatisinznasaĉha. Yoozkazza ultimu yatisinskatŋiqui. ⁴ Wejrqui persun kuzquiz ana ĉĵjul uj wachuĉhaj niimi, Yooz yujcquiziqui cunamiĵlani wejr ujchiztni. Ultimquiziqui Yooz Jiliriqui wejr yatisinskataquiĉha. ⁵ Jalla niĵtiquiztan anĉhucqui Yooztakaz anaĵ yekjapanacĵquiz tantiiz waquiziĉha, ima pjalz tjuŋi tjonanaqui, niĵaza ima Jesucristo Jiliriĵ tjonanaqui. Ultimquiziqui Jesucristo Jiliriqui chjojta anawalinaca kjanapacha tjeeznaquiĉha. Niĵaza tjapa ŝoŇinacĵ kuzquiz pinsitanaca tjeeznaquiĉha, zumpacha pjalzjapa. Jakziltami zuma lijituma ulnaĉhaja, jalla niiqui

honorchiz cjequičha; Yooziž tjaata honoržtan.

MITARAZI KUZZIZ ŽOŇINACA

⁶ Jilanaca, cullaquinaca, Apolužtan wejtta jalla nii wejtnaca puntuquiztan chiyučha, ančhucquiz tjaajznajo. Wejtnacaž tjaajintami nižaza kamtami Yooz tawk jaručha. Jalla nuž nayžcu, ančhucmi Yooz tawk jaru kamñi kuzziz cjee. Anačha mitarazi kuzziz cjiicjiisqui, “Wejt Yooz taku tjaajiñiqui juc'ant zumačha; am Yooz taku tjaajiñiqui anal pecučha”, cjicanaqui. ⁷ ¿Ject ančhuca t'aka parti žoñinacžquiztan tucquin uchjo? Ančhuca t'akaž juc'ant waližlaj niiqui, Yoozpankaz juc'ant wali cjiskatchičha. Ančhucqui anačha persunpacha wali cjisnasačha. Jalla nižtiquiztan anačha atinaru kuzziz chichiizqui, “Juc'ant waličha wejt t'akaqui”, cjicanaqui.

⁸ ¿Ančhucqui wejrnac wirquin ecchinčhucjo? ¿Ančhucqui tjapa Yooz puntunaca zizjo? ¿Wali chawjc jilirinacažtakaz ančhucqui kuzquiz sint'ejo? ¿Wejrnac wirquin ecchinčhucjo? Ultimquiziqui ančhucqui anačha nižta. Jalla nižta cjenacqui walipanž cjesačha. Neesaj wejrnacmi ančhuca partiquiz cjiwčhani, ančhucatan chica jilirinaca cjisjapa. ⁹ Ančhucqui nayčha, Yoozqui wejrnac apostolonaca wirquin ectačha, conta cjisjapa utžta žoñižtakaz, jalla nii. Žoñinacami anjilanacami nižaza tjapa tii muntuquiz žejlñinacami wejtnacaquiz chekža. Ana wali žoñinacažtakaz wejtnacaquiz chekža. ¹⁰ Wejrnacaž Jesucristuž puntuquiztan paljayan ana criichi žoñinacaqui cjiñičha, “Zumzu žoñinacčhucčha”. Nuž cjicanž wejtnacaquiz iñarčha. Ančhuczti persun puntuquiztan pinsiñčhucčha, “Cristuž cjen zuma

zizñi žoñinactčha wejrnacqui”, cjicanaqui. Wejrnac apostolanacaqui humilde kuzziztčha. Ančhuczti persun puntuquiztan pinsiñčhucčha, “Tjup kuzziztčha”, cjicanaqui. Wejrnacqui iñartačha. Ančhuczti rispitta žoñižtakazza. Ultimquiziqui ančhucqui anačha nižta. ¹¹ Anzcama wejrnac apostolanacaqui ancha sufručha čhjerquiztanami kjazquiztanami, nižaza zquitquiztanami. Nižaza wejrnacqui kichtačha. Nižaza anačha wejrnacqui žejlž kjuychiztqui. ¹² Nižaza persun kjaržtan ochañcama langznučha. Žoñinacaž wejtnacaquiz iñaranami zuma tawkžtan kjaaznučha. Nižaza žoñinacaž wejtnacaquiz ana wali paanami, zuma tjurt'iñi kuzziz awantučha. ¹³ Žoñinacaqui wejtnaca puntuquiztan quintra chiičha. Jalla nuž quintra chiyanam, wejrnacqui zuma pazinziz kuzziz chiižinučha. Nižaza žoñinacaqui wejtnacaquiz tsjii cjujchi irataž cherčha, nižaza wirquinpanž tewjcža tsjii juc'ant ana zuma kamñi žoñižtakaz. Jalla nuž wejtnacaquiz watačha.

¹⁴ Jalla nuž cjiyržcučha ana ančhuc azkatzjapa, antiz ančhucquiz chiižinžcučha wejt k'ayi maatinacaž cjen. ¹⁵ Weriž Jesucristuž puntuquiztan paljaytiquiztan, ančhucqui Jesucristužquin criichinčhucčha. Jaziqui wejrqui ančhuca ejp cuntitčha. Kjažtamit ančhucquiz wacchi tjaajiñinaca, nižaza irpiñinaca želačhani, tsjii ejpchizčhucakazza. ¹⁶ Jalla nižtiquiztan jaknužt wejr zuma kamučhaja, jalla nižta ančhucqui zuma kamz waquizičha.

¹⁷ Jalla nižtiquiztan wejt k'ayi Timoteo cuchanžcučha, ančhucquiz cjuñkatzjapa, jaknužt wejrqui Jesucristo sirwican kamtučhaja, jalla nii. Nižaza tjapa kjutñi tjapa

icelziziz žoñinacžquizimi tjaajnuča, jaknužt žoñinacžlaqui Cristuž kamañchiz kamzlaja, jalla nii.

Jalla nuž Timoteoqui ančhucaquiz cjuñkataquiča. Timoteoqui zuma cumpliñi žoñiča. Timoteoqui weriž cjen Jesucristužquin criichiča.

¹⁸Yekjapanacaqui ančhucaquiztan mitarazi kuzziz cjissinčhucča. Tuz pinsichinčhucča, “Pabluqui anapanž tjonžni tjonasaka”, cjan. ¹⁹Yooz munan, wejrqui wajillaž tjonacha. Nekztan wejrqui nii mitarazi kuzziz žoñinacž langžta obra pajača, nižaza jaknižta kamañchizlaja, jalla nii. Nii žoñinacž chiitami wejtquiz anaž importiča. ²⁰Yooz mantuquiz kamcan, Yooz aztan zuma kamstanča. Jalla niiča chekanaqui; chiita takunacakazza anaž chekanaqui.

²¹¿Jaknužt ančhuc pecjo? ¿Ančhuc casticzjapa, wejrqui tjonz waquiziya? ¿Už humilde kuzziz k'ayachtican tjonz waquiza ja'? ¿Weriz tjonanaqui kjaž cjiñiž pec ančhucjo?

ANA WALI KAMTA QUINTU

5 ¹Jilanaca, cullaquinaca, wejtquin tsjii ana wal quintu tjonchiča, ančhucaquiztan tsjiiqui niiz wiri maa persun tjun tjacsiquiča. Jalla niiqui juc'ant anawaliča. Ana criichi žoñinacami ana nuž paača. ²Jalla nuž cjenami ančhucqui tirapan mitarazi kuzzizčhucča. Pero ančhucalaqui llaquit kuzziz cjis waquiziča. Jalla nižta ana wali paañi žoñiqui ančhucaquiztan jaytitaj cjila. ³Wejrqui ančhucatan ana chica želuča. Jalla nuž cjenami, kuzquiz llaquita sint'ižcuča. Nuž sint'ižcu wejrqui nii uj paañi žoñž puntuquiztan tantiichinča, ana wali paača, jalla niiqui. ⁴Ančhuczti wejt llaquita kuz cjuñžcan, Jesucristo Jilirž tjuuquiz

ajcnaquiča nii uj paañi žoñž puntu tantiizjapa. Jalla nuž ajcžu, Jesucristo Jiliriqui niiz aztan ančhucatan chicaž cjequiča. ⁵Nekztanaqui ančhucqui nii uj paañiqui Satanasquiz intirjaquiča, niiz curpu t'akjisajo. Niiž curpu t'akjstiquiztan cunamit niiz kuzqui azquichta cječhani. Jalla nekztanaqui Jesucristuž tjonanaqui niiz animuqui liwriita cječhani.

⁶Ančhuc mita kuzziz cjisqui anawaliča. Jalla tii chiita taku cjuñza, “Koloculla liwraturaqui tjapa t'anti maza t'amcha”. Jalla nižta iratača nii anawal žoñiqui ančhucatan chica kamcan parti žoñinacžquiz anawali cjiskatasacha. ⁷Tjapa ančhuc anawali kamañanaca eca, zuma kamañchizpan cjisjapa. Jesucristuqui učhum cuntiquiztan tsjii wilanažtakaz ticziča, učhum ujquiztan ana casticta cjejajo. Jalla nižtiquiztan ančhucqui ana ujchizza Yooz yujcquiziqui. Tsjii zuma t'anti maza cuntiçhucča. ⁸Jaknužt pascua pjijsta paañinaca zuma kamañchiz cjis pecčhaja, jalla nižta irata učhumqui zuma kuzziz cjis waquiziča, nižaza Yooz kuzcama lijituma kamz waquiziča. Anazuma kuzziz, nižaza anazuma kamañchiz, jalla nižta kamz ana waquiziča.

⁹Tuquiqui cartiquiz cjijržquichinča tuž cjan: “Adulterio paañinacžquiztan jaytaquiča, nižaza nižta paañinacžtan anaž cumpant'iz waquiziča”. ¹⁰Jalla nuž cjijržcu wejrqui ultimupan anal cjiwča, tjapa ana criichi adulterio paañinacžtan ana želajo. Ana criichi žoñinacaqui anawaliž paača, adulteriuquiz ojklajča, nižaza cusanacžquiz kuz tjaacha, nižaza tjañi zaača, nižaza žoñiž paata yooznaca sirwiča. Tii muntuquiz nižta anawali paañi žoñinaca panž žejlča. ¹¹Yekjapanacazti “Yoozquin criyuča”

cjican, anawali paača; adulteriuquiz ojklayča, nižaza cusasanacžquiz kuz tjača, nižaza žoniž paata yoonaca sirwiča, nižaza anawal takunaca joojooča, nižaza licča, nižaza tjañi zaača. Jalla nižta anawali paacan jakziltat Yoozquin criyuča” cječaj niiqui, jalla nižta žoñinacžtan ana ojklayaquiča. Nižaza anača nižta paañinacžtanaqui čherimi lujlsqui. Panž ana cumpant'auquiča.

¹²Wejrqui ana criichi žoñinaca anača wejlaqui tantiistanqui. Antiz učhumqui icliz žoñinaca tantiistanča, ujhiz ana ujhiz, jalla nii. ¹³Nii uj paañi žoñi jaytitaj cjila. Pero Yoozqui nii ana criichi žoñinaca tantiyaquiča, casticzjapa.

QUIJZ PUNTU

6 ¹Jakziltat tsjii jilž quintra quijačhaja, jalla niiqui ana criichi juez yujcquiziqui anaž quijz waquiziča. Pero criichi jilanacžquin quijspanča. ²Jesucristuž tjontan criichi jilanacaqui tjapa ana criichi žoñinacž puntu jusjisaquiča. ¿Nii ana ziz ančhucjo? ¿Tjapa ana criichi žoñinacž puntu jusjisaquiž niiqui, kjažt tsjii quija ana azquichi atasajo? ³Criichi žoñinacaqui anjilanacž puntu zakaz jusjisaquiča. ¿Nii ana ziz ančhucjo? Jaziqui anjilanacž puntu jusjisaquiž niiqui, ¿kjažt tii muntuquiz žejlñi quija ana azquichi atasajo? ⁴Ančucaquiz quijanaca želaquiž niiqui, ¿kjažt ančhucqui ana criichi žoñžquin quijjo? Criichinacžquiztanaqui anaž čhjulumi ninacaqui. ⁵Jalla nuž tii puntuquiztan chiižinuča ančhuc azajo. Ančucaquiz quijanacača anaž cjichuca. ¿Tsji quija želan, ančucaquiztan anaj azquichi atñi žoñi žejl, kjažtatajo? ⁶Ana criichi jilirž yujcquiz quijas, ¿kjažtatajo?

⁷Quija želanaqui, kjanapacha tječa, ančucaquiz ana waliča, jalla nii. Nii criichi jilaž uj paatiquiztanaqui nuž pasinza paachucakazza. Nižaza awantichucakazza. ⁸Pero ančhucpachača persun criichi jilanacž quintra payiñchucqui, ana walinaca paacan nižaza tjañi zaacan, jalla nuž.

ARAJPACHQUIN KAMZ PUNTU

⁹Ana wali kamañchiz žoñinacaqui anaž arajpach wajtquin Yooztan chica kamasacha. ¿Jalla nii ana ziz ančhucjo? Jaziqui ančhucqui anača incallta cjisqui. Arajpachquin anaž okaquiča tii žoñinacaqui: adulteriuquiz ojklayñinaca, nižaza žoniž paata yooz sirwiñinaca, nižaza pampa cjecjiñi zultirunaca, nižaza luctakpora tsjii luctakžtan tsjii maatakžtantakaz cjejasñinaca. ¹⁰Nižaza tjañinaca, nižaza cusasanacquin kuz tjañinaca, nižaza licchinaca, nižaza quintra chiichiñinaca, nižaza žoñinacžquiztan kjañz pecñinaca. Jalla tjapa nižta žoñinacaqui arajpachquin anapan okasača Yooztan wiñaya kamzjapa. ¹¹Ima Yoozquin criicanaqui yekjap ančhucqui nižtatača. Anziqui Jesucristo Jiliriz cjen, nižaza Yooz Espíritu Santuž cjen ančuca ujnacaqui pertuntača. Jalla nižtiquiztan ančhucqui Yooz partiquiz cjissiča, nižaza Yooz yujcquiziqui walikaz ana ujhiz cjissiča ančuca ujquiztan liwriita.

YOOZTAJAPAČHA UČHUMQUI

¹²Jilanaca, cullaquinaca, tsjiilla cjesača. Yekjapa ančhucqui chiičhani, criichi žoñiqui liwriitaž cjen čhulu paazmi paasača. Pero čhulu paazmi zuma kamañchiz kamzjapa anaž yanapča. Čhulu paazmi paasača, pero čhul paazmi ana

wejt kuz atipskatz pecučha. ¹³Tužuča razunaqui. Čheriqui pjuchjapača. Nižaza pjuchqui čherijapača.

Ultimquiziqui Yoozqui piscpacha liwj tucuzinkataquiča. Tužuzakazza razunaqui, učhum persun curpuqui anača adulterio paazjapaqui. Antiz učhum curpuqui Jesucristo Jiliržquiz sirwiñijapača. Nižaza Jesucristo Jiliriča učhum curpuž mantiñiqui.

¹⁴Yooz Ejpqui Jesucristo Jiliri jacatatskatchiča. Nižaza Yoozqui niiz persun aztan učhum curpunaca jacatatskataquiča.

¹⁵Učhum curpunacaqui Jesucristužtajapača. ¿Jalla nii ana ziz ančhucjo? Jalla niztiquiztan ¿kjažt criichi žoñž curpuqui putirii maatakžquin tjaata cjesajo? Anapanž cjichuca. ¹⁶Jakzilta žoñit putirii maatakžtan adulterio paačhaj niiqui, nuž pucultan tsjii curpuchiztakaz cjissa. Cjijrta Yooz takuqui tuž cjiča: “Luctakžtan maatakžtan lucutiñi cjequiz niiqui, tsjii curpuchiztakaz cjisnaquiča”. ¿Jalla nii Yooz taku ana ziz ančhucjo? ¹⁷Nižaza jakzilta žoñit persun kuz Jesucristo Jiliržquin tjaaquiz niiqui, nuž pucultan tsjii kuzziz cjissa.

¹⁸Adulterio cjcijisqui anapanž pecalla. Jalla nižta paaquiz niiqui, persunažtajapa quintraž paača. Parti paata ujnacaqui, anaž nii adulterio ujžtapachaqui. ¹⁹Ančhuca curpuqui Yooziž tjaata Espíritu Santuž kjuya timplučha. Jalla nižtiquiztan Espíritu Santuqui ančhucaquizpacha žejlčha. ¿Jalla nii ana ziz ančhucjo? Ančhucqui patrunchizpanča. ²⁰Yoozqui ančhuc kjaychiča, wali preciužtan, Jesucristuž ljocžtan. Jalla nižtiquiztan ančhuca curpuquiztanami kuzquiztanami Yooztajapa honora waytiz waquiziča. Jalla nuž pizcpacha Yooztajapapanča. Jilanaca, anača uj paazqui.

ZALZ PUNTU

7 ¹Jaziqui amiž cjijrta pewčžtanacquiz kjaaznasača. Jaziqui tii chiižinuča. Ana zalzqui walikazza. ²Jalla nuž cjenami tii timpuquiz zalz waquiziča, ana adulterio ujquiz tjojtšjapa. Jalla nižtiquiztan zapa luctaka tsjaa maatakžtan zalz waquiziča. Nižaza zapa maataka tsjii luctakžtan zalz waquiziča. ³Tsjii lucuqui zuma lucužta cjispanča persun maatakžtanaqui. Nižaza tsjaa tjunqui zuma tjunažta cjispanča persun luctakžtanaqui. ⁴Tjuna curpuqui persun lucžtajapapanča. Nižaza lucž curpuqui persun tjunaltajapapanča. ⁵Nižaza porapat lucutiñi curpu tjaa-asaquiča. Porapat tsjii acuerduquiz luzasaquiz niiqui, tsjii kjažtallaž nicasasača, Yoozquin mayizizquin kuz tjaažjapa. Nii acuerduquiz luzta timpu wattan, nii lucutiñiqui ana iya nicz waquiziča. Tira nicaquiz niiqui persun curpu ana ewjazni atačani, nekztan Satanás diabluqui nii ana ewjazni attiquiztan nižaza nictiquiztan adulteriuquiz tjojtškatasacha.

⁶Nekztan jalla tuž chiižinuča, pero anal ultimu mantuča. ⁷Wejrqui ana zalzničha. Jalla nižta kamniž cjičhaj tjapa ančhucqui, jalla nižtal pecučha wejrqui. Pero Yoozqui zalz kamaña, nižaza ana zalz kamaña tjaača. Jalla nižtiquiztan zapa mayni niiz persun Yooziž tjaata kamañ jaru kamstanča. Jalla niiqui walikazza.

⁸Zuliržquizimi, žew luctakžquizimi žew maatakžquizimi tuž chiižinuča ančhucaquiz. Wejr irataž cjičhaj ančhucqui, ana zalni. Jalla niiqui waliž cjesacha. ⁹Anchapanž zalz pecčhaj niiqui, zalzna cjichucača. Ana zalzcanpacha nižaza ancha

maataka peccan želasaz niiqui, ujquiz tjojtznasača. Jalla nuž cjenauqi zalzla cjichucapanikazza.

JALJTIZ PUNTU

¹⁰⁻¹¹ Zalzi žoñinaca, ančhucaquiz wejr mantuča, jalla tuž. Tsjaa tjunqui naaža persun luctakžtan ana jaljtiz waquiziča. Nižaza tsjii lucuqui niiz persun tjunatan ana jaljtiz waquiziča. Jaljtaquiz niiqui, ana iya yejkžtan zalznasača. Pero nii lucutiñ žoñiqui porapat pertunas waquiziča. Jalla tii mantitaqui anača weriž mantitakazzi, Yooz Jiliriž mantitapanča.

¹² Parti žoñinacžquiz chiižinuča, tii chiižintaqui ana Yooziž mantitača. Tsjii criichi žoñiqui ana Yoozquin criichiñ tjunchizlaj niiqui, nižaza naa tjunqui lucutiñpan kamz pecčhaj niiqui, nii criichi lucuqui ana jaljtiz waquiziča. ¹³ Nižaza tsjii criichi maatakaqui ana criichi lucchizlaj niiqui, nižaza naaža lucuqui lucutiñpan kamz pecčhaj niiqui, naa criichiñ tjunqui ana jaljtiz waquiziča. ¹⁴ Naaža cjen Yoozqui naaža ana criichi lucu cwtiča. Nižaza Yoozqui ana criichiñ tjun cwtiča naaža Yoozquin criichi lucchiz cjen. Ana nižta cjequiz niiqui, nii lucutiñ maatinacaqui ana criichi žoñinacž maatinacažtakaz cjesača. Pero Yoozqui nii lucutiñ maatinaca cwtiča. ¹⁵ Pero tsjii ana Yoozquin criichi lucumi už tjunmi jaljtizpanž pecčhaj niiqui, tsjiikaj jaljtila cjichucača. Jalla nižta wataquiz niiqui nii Yoozquin criichi lucu cjicu už tjun cjicu jaljtasača, porapat zuma kamasajo, ana wali kamchuca cjenauqi. Yoozqui učhum criichinaca kjawzicha, zuma kamajo. ¹⁶ ¿Criichi lucuqui niiz ana criichiñ tjun ultimu Yoozquin criiskatasajo? Ana zizzucača. ¿Nižaza criichiñ tjunqui naaža ana criichi lucu

ultimu Yoozquin criiskatasajo? Ana zizzucača.

YOOZIŽ TJAATA KAMAÑ JARU KAMZ WAQUIZIČHA

¹⁷ Zapa mayniqui Yooziž tjaata kamañ jaru kjažtachichimi kamz waquiziča. Yooziž kjawžtaž cjen tsjii wira kamchinčucča. Jalla nii wira ana Yooz quintrazlaj niiqui, nižta kamzquiz cjesača. Jalla nužupan mantuča tjapa iclizziz žoñinacžquin. ¹⁸ Criiz oraqui jakziltat judío žoñž chimputažlaj niiqui, chimputa žela. Nižaza criiz oraqui jakziltat ana chimputažlaj niiqui, ana chimpuskata. ¹⁹ Chimputami ana chimputami anaž importiča. Yooz mantitacama kamzqui, jalla niiča importaqui. ²⁰ Yoozquin criižcuqui čjul žoñimi čjul kamañchizlaja, jalla nii kamañquiz cuntintu žejlkazza. ²¹ Criiz oraqui žoñž mantuquiz žejlcanami, amqui ana kuz turwayskataquiča. Nekztan, jalla nii žoñž mantuquiztan liwriita cjesaž niiqui, pan ulnaquiča, liwrii cjisjapa. ²² Jakzilta criichi žoñit žoñž mantuquizlaj niiqui, nii žoñž mantuquiz tira žejlcanami, cjuñzna, Jesucristo Jiliriž liwriitača, nii. Nižaza jakzilta criichi žoñit žoñž mantuquiz ana žejlčhaja, tii cjuñzna, Jesucristuž mantuquiz žejlča, nii. ²³ Yoozqui ančhuc kjaychiča wali jila precužtan. Cristuž ljokča nii precuqui. Jalla nižtiquiztan žoñž mantuquiz anača cjiskatsqui. ²⁴ Yoozquin criižcuqui čjul žoñimi čjul kamañchizlaja, jalla nii kamañquiz žejlz waquiziča. Kjažtachichimi cuntintu cjequiča Yooztan chica kamchiž cjen.

ZALZ PUNTU

²⁵ Yoozqui wejtquiz ana taku tjaačiča zultirunacž puntuquiztan.

Pero, wejrqui tuž chiižinuča. Nižaza cjuñzna, Yoozqui wejtquiz apóstol kamaña cumpjiichiča. Nižaza nii apóstol kamañ jaru panž kamuča. Wejrqui Yooziž illztitča niižquin sirwizjapa. Jalla nižtiquiztan weriž chiižinta tawquiz kuz tjaaž waquiziča. ²⁶Tuž chiižinuča. Tii timpuquiz kamzqui ch'amača criichi žoñinacžtajapaqui. Jalla nižtiquiztan čjul kamañchizlaja, jalla nii kamañquiz žejlz waquiziča. Zalzižlaja, zalzi žela; ana zalzižlaja, ana zalz waquiziča. ²⁷Jakziltat tjunchiz cječhaja, anaž persun maatakžtan jaljtiz waquiziča. Nižaza ana zalzi žoñiqui maataka kjurz ana waquiziča. ²⁸Pero jakziltat zalznačhaja, jalla nii zalžtaqui anača ujqui. Nižaza jakzilta turt zalznačhaja, jalla nii zalžtaqui anača ujqui. Tii ch'ama kamz timpuquiz zalzñinacžquiz juc'ant llaquinaca cjequiča. Wejrqui anaj nižta llaquita kamjaa ančhuc cjiwčhiya.

²⁹Jilanaca, cullaquinaca, tii walja ch'ama kamz timpuqui ana ažka tjuraquiča. Jalla nižtiquiztan tekztan nawjčchuc tjunchiz žoñinacaqui anaž tjunaquiz juc'anti kuz tjaaquiča. Antiz Yoozquin juc'anti kuz tjaaquiča. ³⁰Nižaza llaquita žejlñi žoñinacaqui anaž ancha llaquisaučiča. Yooztan kamčizi cjen cuntintu cjequiča. Nižaza čjulquiztan chipsñi žoñinacaqui anaž juc'anti kuz tjaaquiča chipchipsquiziqui. Yoozquin juc'anti kuz tjaaquiča. Nižaza cusasanaca kjayñi žoñinacaqui anaž juc'anti kuz tjaaquiča kjayta cusasanacquiz. ³¹Tii muntumi nižaza tii muntuquiz žejlñimi tucužinzaquiča. Jalla nižtiquiztan jakziltat tii muntuquiz želinchiz cječhaja, anaž nii želinchizquiz kuz tjaaquiča. Antiz Yoozquin juc'anti kuz tjaaquiča.

³²Ančhucqui tii muntu kamcan kuz turwayzquiztanaqui liwriitakaj cjejal cjiwčhiya. Ana zalzñi žoñinacaqui Yooz kamañquizekaz kuz tjaačhaja; Yooz kuz cuntintu cjiskatz pecča. ³³Zalzñi žoñinacazti Yoozquin sirwicanami tii muntu kamañquiz kuz tjaača, persun tjun cuntintu cjisjapa. ³⁴Nižaza zalzi maatakž kamañžtan zultir maatakž kamañžtan anača tsjikaz. Ana zalzi maatakqui Yooz kamañquizekaz kuz tjaača. Curpumi kuzmi Yoozquin sirwizquin tjapa kuz tjaača. Pero zalzi maatakzti Yoozquin sirwicanami tii muntu kamañquiz kuz tjaača, persun lucu cuntintu cjisjapa.

³⁵Tii weriž chiižintaqui ančhucalta wali cjisjapača, anaž ančuca atajzjapa. Nižaza tii weriž chiižintaqui ančucaquiz zuma kami yanapzjapača, nižaza Yoozquinpankaz tjapa kuz tjayi yanapzjapa.

³⁶Tsjiilla cjesača, zalz puntuquiztan zakaz. Jakzilta žoñžtat tsjaa majt želačhaja, zalz irarquiz tjonchiñ, nižaza ancha zalz pecchiñ. Ana chajalztiquiztan niž kuz turwayskatčhaj niiqui, tuž chiižinuča. Niiž tur chjalz wali tantiižcu, chjalznasača. Nii chjalzqui anača ujqui. ³⁷Tii puntu iyal chiižinuča. Naa tura ejpqui ana chjalz pecčhaj niiqui, ana chjalzucacha. Walikaz cjesača. Naa turaž cjen, ana jarita cjesaž niiqui, nižaza niž persun kuzquiz ana chjalz pinsitacamažlaj niiqui, ana chjalzucaz cjesača. Jalla nii ana chjalzqui waliž cjesača. ³⁸Jaziqui nii chjalzñi žoñiqui walikaz paača. Pero nii ana chjalzñi žoñizti juc'ant walikaz paača.

³⁹Zalzñi maatakaqui persun lučtan kamaquiča, čjulorac ticznačhaja, jalla niicama. Jalla niiqui liy jaruča. Jalla nuž lucu ticzi cjenauqui naa žew žonqui yekja lučtan zalznasača, pero

Yoozquin criichi žoñizakaz cjesača.
⁴⁰ Pero naa žew žon ana zalznaquič
 niiqui, juc'ant cuntintu cjequiča. Jalla
 nuž pinsuča wejrqui. Nižaza Yooz
 Espiritu Santuča wejt kuzquiziqui,
 weriž pinsita zuma cjisjapa.

ŽOÑIŽ PAATA YOOZNACQUIN TJAATA ČHJERI PUNTU

8 ¹ Tsjiilla cjesača, žoñiž paata
 yooznacquin tjaata čhjeri
 puntuquiztan. Ančhucqui cjiča:
 “Tjapa wejrnacqui nii puntuquiztan
 zizuča”. Pero wejr cjiwča, jakziltat
 “Wejrtča ziziñtqui”, cječhaj niiqui, mit
 kuzziz cječhani. Nižaza jakziltat zuma
 munaziñi kuzziz cječhaj niiqui, parti
 criichi žoñinacažquiz yanapstanča
 zuma kamañchiz cjeýajo. ² Jakziltat
 persun kuzquiz pinsican: “Ultim
 weraral zizuča”, cjian cječhaja, jalla
 niiqui ana zuma zizza. Anapanž ultim
 werara zizasača. ³ Jakziltat Yoozquin
 tjapa kuz tjaačhaja, Yoozqui nii žoñi
 pajča niž maati cunta.

⁴ Jaziqui nii žoñiž paata yooznacquin
 tjaata čhjeri puntuquiztan, tuž
 cjiwča. Žoñiž paata yooznacqui
 anapanča ultim Yoozqui. Nižtiquiztan
 anača čhjulumi. Werar Yoozqui
 zintallapanikaz žejlča. ⁵ Tii
 muntuquiz žejlñi žoñinacž yooznacqui
 wacchiča. Ana criichi žoñinacqui
 tii yokquiz žejlñimi nižaza tsewc
 arajpachquin žejlñimi cjiča, “Niiča
 Yoozkaz”, nižaza “Niiča učhum
 Jiliriqui”, panž cjiča. ⁶ Učhumnacalta
 tsjii werar Yoozkaz žejlča. Tsjii Yooz
 Ejpa žejlča. Niiqui tjapa žejlñinaca
 paachiča. Nižaza učhumnacqui
 nižtajapača. Nižaza tsjii Jesucristo
 Jilirikaz žejlča. Niž cjen tjapa
 žejlñinaca žejlča, nižaza niž cjen
 učhumnacaltaqui ew žejtz kamaña
 žejlča.

⁷ Žoñiž paata yooznac puntuquiztan
 yekjap criichi žoñinacqui ana zuma
 intintiča. Tuquita yekjapanacqui
 ančhucquiztan žoñiž paata yooznaca
 sirwiñitača. Jalla nižtiquiztan anziq
 yooznacquiz tjaata čhjeri lujlcan, nii
 paata yooznacquin pinsiča, nižaza
 persun kuzquiz sint'iča. Jalla
 nižtiquiztan nii čhjeri lujlchiž cjen
 ultim Yooz quintra uj paača. ⁸ Yooz
 yujcquiziqui čhjeri lujlchi cjenami ana
 čhjeri lujlchi cjenami anaž importiča.
 Jakziltat čjul čherimi lujlčhaj niiqui,
 nii čherquiztan anaž tsjan Yoozquin
 kuzziz cjesača. Nižaza jakziltat ana
 tjapaman čhjeri lujlčhaj niiqui, nii
 ana tjapaman čhjeri lujltiquiztan ana
 upa Yoozquin kuzziz cjesača. ⁹ Pero
 žoñiž paata yooznacquin tjaata čhjeri
 lujlquiztan cwitzaquiča, ana tsjii
 ana zuma intintiñi criichi jila ujquiz
 tjojtskatzjapa. ¹⁰ Ančhucqui zizza, žoñiž
 paata yoozqui anača čhjulmi, jalla
 nii. Nižaza ančhucqui žoñiž paata
 yooznacquin ana sint'iča. Pero
 yekjap jilanacazti tirapan žoñiž paata
 yoozquin kuzquiz sint'iskatča, ultim
 Yoozquin criichi cjianami. Jaziqui
 yekjap ančhucquiztan žoñiž paata
 yooz timpluquiz čhjeri lulasača.
 Pero tsjii jilaqui ančhuc cheržcu
 lujlž zakaz pecasača, aunquimi nii
 žoñiž paata yoozquin sint'icanami.
 Jalla nižtiquiztan nii žoñiž paata
 yoozquin sint'iñi jilaqui ultim Yooz
 quintra uj paasača, nii žoñiž paata
 yoozquin tjaata čhjeri lujlžcu.
¹¹ Jaziqui ančhucž lujltiquiztan nii
 criichi jilaqui werar Yoozquiztan
 zarakskatča. Jesucristuqui nii jilž
 laycu ticziča, jalla. ¹² Pero ančhucqui
 nii jilž kuz ana wali cjiskatča. Jaziqui
 nii jilž quintrami uj paača, nižaza
 Cristuž quintrami uj paača. ¹³ Jalla
 nižtiquiztan žoñiž paata yoozquin

tjaata čhjeri lujlchiž cjen wejt jila ujquiz tjojskatasaz niiqui, anapan nii čhjeri lujlz pecučha. Wejrqui anapan yekja jila ujquiz tjojskatz pecučha.

PABLUŽ KAMAÑA PUNTU

9 ¹Wejrqui liwriitčha. Jalla nižtiquiztan čhjulu paazmi paasačha. Wejrqui Jesucristuž cuchanžquita apostoltčha. Nižaza wejrqui persun čhjujčtan učhum Jesucristo Jiliri cherchinčha. Nižaza weriž Yooz taku paljaytiquiztan, ančhucqui Jesucristo Jiliržquin criichinčhucčha. Jaziqui ančhucqui wejt obra cuntačha Yooztajapaqui. ²Cunamit yekjapanaca wejr ana apóstol pajčhani. Ančhuczti wejr apóstol pajstančha. Ančhucaz Jesucristužquin criichiž cjen, wejrqui kjanapacha tjeeztitčha, ultim werara apóstol, jalla nii.

³Wejt quintr chiiñinacžquiz kjaaznučha, tuž cjan: Wejrtčha lijitum apostoltqui. ⁴Jalla nižtiquiztan criichi žoñinacaz tjaata čhjerimi nižaza čjul tjaatami tanzasačha. ⁵Nižaza apóstol kamañquiz ojklaycan criichiñ tjun chjichasačha. Jalla nižta chjichničha parti apostolanacqui, nižaza Jesucristo Jilirž persun lajknacami, nižaza Pedrumi. ⁶Wejttan Bernabežtan Yooz taku paljaycan tirapan langznučha, persuna mantinzjapa. Jalla nuž cjenami, tii mantinzjapa langzqui jaytasachha, ančhucqui wejr mantinžinajo.

YOOZ TAKU PALJAYÑI ŽOŇŽ PUNTU

⁷Tsjiilla cjesačha nii puntuquiztan. Zultatunacqui anaž sirwičha, persuna mantincan. Nižaza zkala langžni žoñiqui zkala čherquiztan lulasačha. Nižaza uuza ichni žoñiqui uuži lichiz licačha. Jalla nužupančha

tii muntuquiziqui. ⁸Anačha wejt kuzquiztankaž tii chiitaqui. Jalla nuzupanž chiičha Moisés cijjrta Yooz takuqui. ⁹Nii Moisés cijjrta liiquiziqui tuž cjičha: “Tsjii zkala jojni wacaqui anaž ñujcz waquizičha”. Yoozqui jalla nuž cjan chiičičha anačha wacžtajapa, ¹⁰antiz wejrnacaltajapačha. Nijjapa nii Yooz taku cijjrtačha. Zkal yoka kjullni žoñimi, nižaza zkala jojni žoñimi tjewznačha zkalkuiztan tsjižtan tanzjapa. ¹¹Jaziqui wejrnacqui ančhucquiz Yooz taku paljaychinčha, zkala čhjaczhtakaz. Jalla nižtiquiztan wejtnacalaqui ančhucquiztan mantinzjapa tanzni cjičhuc, zkala langžni žoñižtakaz.

¹²Yekja Yooz taku tjaajiñi žoñinacqui ančhucquiztan mantinzjapa tanchipančha. Wejtnacalaqui ančhucquiztan juc'anti tanzuca. Wejrnaczi anapan wira mantinz exijcan kamiñčha. Wejrnacqui persuna langztiquiztan mantincan kamiñčha. Čhjulumi awantučha liwriñi Cristuž taku catokz ana atajta cjeajajo. ¹³Timpluquiz langžni žoñinacqui simpluquiztan mantiñičha. Nižaza simplu altarquiz wilana jawkni žoñinacqui wilana jawkta chjizwiquiztan mantiñitachha. Jalla nii ančhucqui zizza. ¹⁴Jalla nižtapacha Jesucristo Jiliriqui mantichičha, jakziltat liwriñi Yooz taku paljayačhaja, jalla niiqui nii Yooz taku paljayz langzquiztan mantinasačha.

PABLUQUI YOOZ TAKU PALJAYČHA, PERSUNA MANTINCAN

¹⁵Wejrqui anapan mantinz exijcan kamiñčha. Nižaza anziqui anal ančhucquain cijjrčhucčha wejr mantinskatzjapa. Ana jakziltižquizimi mantinskatz pecučha. Wejrqui ima žoñžquiz mantinskatzcan ticzkal

pecasaĉha. Tii persuna mantinz honora ana wejtquiztan kjañkatz pecuĉha.

¹⁶Yooz taku paljaycan wejrqui anal mit kuzziz cjesaĉha. Yoozqui wejtquiz nii kamaña tjaachiĉha. Jalla niĝtquiztan Yooz taku paljaystanĉha. Liwriiñi Yooz taku ana paljayasaĝ niiqui, wejrqui castictal cjesaĉha.

¹⁷Niĝaza wejrqui persun kuzcamakaz Yooz taku paljaytasaz niiqui tsjii pacz tjewztasaĉha, weriĝ Yoozquiz yanaptiquiztan. Pero anaĉha wejt kuzcama tii puestuquin kamuĉha. Yoozqui tii Yooz taku paljayz kamaña wejtquiz tjaachiĉha. Jalla niĝtquiztan Yooz taku paljaystanpanĉha wejrqui.

¹⁸Niĝaza liwriiñi Cristuĝ taku paljaycan ana jeczquiztanami cobriñĉha, wejr mantinĝinajo. Antiz persunpacha mantinuĉha. Jalla niĝta ojklayĝcu ancha cuntintutĉha. Jalla niĉha wejt kuzquiz pactaĝtakazqui.

¹⁹Cristuĝ cjen wejrqui liwriitaĉha. Jaziqui ĝoñĝ kuzquiz pinsita jaru ana kamuĉha. Jalla nuĝ liwriitaĝ cjenami, wejrqui tjapa ĝoñĝ kuz jaru paasaĉha, walja ĝoñinaca Cristuĝquin kuzziz cjiskatzjapa. ²⁰Judío ĝoñinacĝtan kamcan, judío ĝoñinacĝ cuzturumpi paa-uĉha, ninaca Cristuĝquin kuzziz cjiskatzjapa. Niĝaza, Moisés liy jaru kamñi ĝoñinacĝtan kamcan, Moisés liy paa-uĉha, ninaca Cristuĝquin kuzziz cjiskatzjapa. Ultimquiziqui anal nii Moisés liy mantuquiz kamuĉha. ²¹Niĝaza ana Moisés liy jaru kamñi ĝoñinacĝtan kamcan, wejrqui zakal Moisés liy jaru ana kamuĉha, nii ĝoñinaca Cristuĝquin kuzziz cjiskatzjapa. Ultimquiziqui wejrqui werar Yooz liy jaru kamuĉha, niĝaza Cristuĝ liy jaru kamuĉha.

²²Niĝaza ĉjulquizimi kuz sint'iskatñi ĝoñinacĝtan kamcan, wejrqui niĝtazakaz kuz sin'tiskattaĝokaz

cjiñĉha, nii ĝoñinaca Cristuĝquin kuzziz cjiskatzjapa. Jalla niĝta punta punta kamuĉha, jaknuĝumi ĝoñinaca liwriita cjeajajo. ²³Jalla niĝta punta punta kamuĉha, ĝoñinacĝquiz liwriiñi Yooz taku criiskatzjapa. Niĝaza jalla niĝta kamuĉha, persunpacha Yoozquiztan zumanaca tanzjapazakaz.

²⁴Tsjiiilla cjesaĉha. Anĉhucqui tuĝ zizza. Tsjii zajtniquiz tjapa zajtni ĝoñinacĝquiztan tsjiillapankaz ganĉha. Jalla nuĝ cjuñĝcu anĉhucqui Yooz jiczquiz tjapa kuztan zajt waquiziĉha, premio ganzjapa. ²⁵Tjapa piluta uziñinacaqui walja istutiĉha ima canchiquiz luzcan. Niĝaza ana walinacquiztan jaytissa tsjan cusa uzinzjapa. Jalla niĝta paaĉha, tsjii ĉjañquiztan paata royti pillu ganzjapa. Nii premiuqui tsjii upacamakaz tjurĉha. Anĉhuczi Yooz jiczquiz zajtĉha, tsjii wiñaya tjurñi premio ganzjapa. Jalla nii premiuqui cjiĉha, Yooztan wiñaya kamz, jalla nii. ²⁶Wejrqui anal inapampa Yooz jiczquiz zajt zajtcan kamuĉha. Tsjii pucultan boxsiyasñi ĝoñinacaqui anaĝ tsjii kjutñi ĉhajcz pecĉha. Antiz panĝ ĉhajcza tsjiizuñĝ yujcquin. Wejrqui jalla niĝtazakaz anal inapampa kamuĉha. Antiz liwriiñi Yooz takucama kamuĉha. ²⁷Wejrqui persun kuzquizpacha ewjasuĉha ĉjul anawalinacami paazquiztan. Wejrqui jalla nuĝ paa-uĉha, Yooz wejr ana wirquin tjewcznajo. Yekjapanacĝquiz zuma tjajjinĝcu wejrqui anal wirquin tjewczta cjis pecuĉha, wejr ana zuma kamchinĝ cjen.

TUQUITA EJPNACĝ KAMTA PUNTU

10 ¹Tsjiiilla cjesaĉha. Wejrqui anĉhucquiz tuĝ zizkatz pecuĉha. Egipto yokquiztan ulanĝquichi tuquita ejpnacaqui tsjir koztan kamatĉha. Moisés irpita

kamat'cha. Nižaza Moisesqui tjapa ninaca Ljoc Kota tjakchi'cha. ²Jalla nuž irpitaž cjen, nižaza Ljoc Kota tjaktaž cjen, nii žoñinacaqui Moiestan tsjii kuzzizta'cha. Jalla nižtiquiztan tjapa ninacaqui Moisés irpiñi bautistažtakazta'cha. ³Nižaza tjapa ninacaqui Yooz tjaata čheri lujlchi'cha. ⁴Nižaza tjapa ninacaqui tsjii pajk maz ajkquiztan Yooz tjaata kjaz licchi'cha, curpu mantinzjapa, nižaza ninacž kuz wali mantinzjapa. Nižaza ninacž kuz wali mantinzjapa Cristuta'cha mazquiztan ulanñi kjaztakaz. Jalla nii Cristuqui chipapacha compa'nt'at'cha ninacaž jiczquiz okan. ⁵Jalla nuž Cristuž compa'nt'ita cjenami, jila parti nii žoñinacaqui anapan Yoozquin kuzzizta'cha. Jalla nižtiquiztan Yoozqui anata'cha cuntintu; ninacž quintra žawjchi'cha. Jalla nižtiquiztan nii žoñinacaqui ch'ekti yokquin ticzi'cha.

⁶Jalla nii tuquita kamtaqui cjiirtata'cha u'chumnaca cjuñajo, nižaza nižta ana walinaca tuquitažtapacha ana paajo. ⁷Jaknužt yekjapa tuquita ejpnaca žoñiž paata yooznacquin sirwit'chaja, jalla nižtapachaqui anapanž kamz waquizi'cha an'chucui. Nii tuquita ejpnacž puntuquiztan cjiirta Yooz takuqui, tuz cji'cha: “Nii žoñinacaqui čheri lujl'cu lic'cu tsajts pijista payi waquintichi'cha.” Jalla nižta irata kamz anaž waquizi'cha.

⁸Nižaza yekjap tuquita ejpnacaqui adulterio paachi'cha. Jalla nižtiquiztan ticzi'cha 23,000 žoñinacaqui tsjii noojikaz. Jalla nii cjuñzna. Adulterio ana'cha paazqui. ⁹Nižaza yekjap tuquita ejpnacaqui: “Yoozza pazinziz kuzzizqui”, cji'chi'cha. Jalla nekztan juc'anti anawalinaca paapaat'cha. Ultimquiziqui Yooz Ejpqui ninaca casticchi'cha. Jalla nii castictiquiztan walja žoñinacaqui ticzi'cha, zkoranacaž

čh'atta. Jalla nii cjuñzna. Ana'cha uj paazqui: “Yoozza pazinziz kuzzizqui”, cji'canaqui. ¹⁰Nižaza yekjap tuquita ejpnacaqui Yooz quintra chutchi'cha. Jalla nižtiquiztan Yoozqui anjila cuchanžquichi'cha ninaca conzjapa. Jalla nii cjuñzcu, an'chucui Yooz quintra chuch anaž waquizi'cha.

¹¹Tjapa tuquita ejpnacaž kamtaqui Yooz tawk libruquiz cjiirtata'cha u'chumnacaquiz chiižinzjapa ana nižta paajo. Tii muntu tucuzinz žcatžinžquichi'cha. Jalla nižtiquiztan tuquita ejpnacaž kamta quintunaca zumpacha cjuñz waquizi'cha, ana nižta kamzjapa. ¹²Jalla tuž cjiw'cha. Jakziltat persun kuzquiz “walikazt'cha wejrqui” cji'can pinsi'chaja, jalla niiqui panž cwitazaquichi'cha, ana ujquiz tjojtsjapa. ¹³Čhjul pruebanacquizimi an'chuc sufri'chaja, jalla nižta pruebanacquiz zakaz tsjii tsjii cri'chi žoñinacaqui sufri'cha. Čhjul pruebanacaž sufriskatta cjenami Yoozqui anchucaquiztan nii pruebanaca ana atipskataquichi'cha. Antiz ultimquiziqui Yoozqui čhjul pruebanacquiztan anchucaquiz atipskataquichi'cha, an'chuc ana čhjul ujquiz tjojtsjapa, nižaza tjurt'iñi kuzziz awantizjapa. U'chum Yoozza zuma yanapñiqui, u'chumnacaž tjapa pruebanaca tjurt'iñi kuzziz watajo.

ŽOÑIŽ PAATA YOOZNACQUIZTAN ZARAKA

¹⁴Weriž pecta jilanaca, cullaquinaca, žoñiž paata yooznacquiztan zaraka. Anapanž ninacžquiz sirwa. ¹⁵An'chuc'cha zizñi žoñinacaqui. An'chucpacha tii weriž chiita taku yatisinznsa'cha, werara ana werara, jalla nii. ¹⁶Cristuqui u'chum laycu ticzi'cha. Jalla nii cjuñznajo Cristuqui cuzturumpi mantichi'cha, uwas kjaz liczmi, nižaza t'anta lujl'zmi. Nii uwas kjazza Cristuž ljoc

cuntaqui. Nižaza nii t'antača Cristuž curpu cuntaqui. Nii Cristuž mantita cutzturumpi paacan Yoozquin gracias cjican chiiča. Nii uwas kjaz liccan Cristužtan tsjii kuzziz cjican tjeeža. Nižaza nii tojžta t'anta lujlcan Cristužtan tsjii kuzziz cjican tjeeža. ¹⁷Tsjii t'anta žejlča, aunquimi t'unapacha kjolžtami. Nižtazakazza učhummi. Walja tama criichinaca želanami, tsjii curpuchiztakazza. Tsjii t'antiquiztan tjappacha lujlča, jalla nuž tjeeža, tsjii kuzzizza tjappacha, cjicanaqui.

¹⁸Israel žoñinacžquiztan tii puntu cjuñzna. Jakziltat Yooz altarquin wilana jawkčhaja, jalla niiqui wilanquiztan lujlcan nii altarž Yooztan tsjii kuzziz cjican tjeeža. ¹⁹Nonžna, žoñiž paata yoozqui anaž čhjulumi. Nižaza žoñiž paata yoozquin tjaata chjizwimi anaž čhjulumi, chjizwikazza. ²⁰Pero jakzilta ana Yoozquin criichi žoñit wilana jawkčhaja, jalla niiqui zajranacžquin wilana onanča, anapanž werar Yoozquin onanča. Jalla nižtiquiztan ančhucqui anaž ninacžtan cumpaňt'iz waquiziča. Cumpaňt'aquiz niiqui zajranacžquiz kuzziz cjican tjeeža. ²¹Anaž jakziltami Cristo Jilirž wasumi nižaza zajranacž wasumi tanznasača. Nižaza anaž jakziltami Cristo Jilirž t'antami nižaza zajranacž čherimi tanznasača. Anača nižta kuzziz cjichuca. Antiz tsjii Yoozquizpanikaz kuzziz cjesača. ²²Jakziltat zajranacž cuzzturumpiquiz mitisaquiz niiqui, jalla nii žoñž quintr werar Yoozqui žawjwaquičha. Jalla nižtiquiztan ančhucqui nuž paaquiz niiqui, castictaž cjequičha. Ančhucqui anača Yoozquiztan juc'anti azziz jalla.

ŽOÑIŽ PAATA YOOZNACŽQUIZ ANA MITISA

²³Jalla tuž werarača. Tsjii criichi žoñiqui liwriitača. Jalla nižtiquiztan

čhjulumi paasača. Pero tjapa paataqui juc'ant Yoozquin kuzziz cjisjapa anaž yanapča. Nižaza čhjulu paatami anaž parti criichinacžquinami yanapča zuma kamañchiz kamajo. ²⁴Parti criichinacaž zuma kamañchiz cjisjapača kuz tjaazqui. Anača persun kamañjapakaz kuz tjaazqui.

²⁵⁻²⁶Cjijrta Yooz takuqui tuž cjičha: “Tjapa tii muntuqui Yooz Jiliržtacamača, nižaza tjapa tii muntuquiz žejlñinacaqui Yooz Jiliržtacamača”. Jalla nižtiquiztan mercatquiz kjayta čherimi lulasača. Anaž persun kuz turwayskataquičha tuž pinsican, tii čherižlan žoñiž paata yoozquiz tjaata čheri, už žoñiž paata yoozquiz ana tjaata čherižlaj, jalla nii.

²⁷Nižaza ana werar Yoozquin criichi žoñiqui čheri lujljapa am impitasaž niiqui, okasača, ojkc pecasaž niiqui. Jalla nuž okaquiz niiqui, čhjul onanta čherimi lujlnaquičha anaž persun kuz turwayskatcan. ²⁸⁻²⁹Pero tsjiiqui amquiz maznačhani, tuž cjican: “Tii čheriqui žoñiž paata yoozquiz tjaata čheriča. Jalla nii čheri ana lujlž waquiziča”. Jalla nuz cjenaku amlaku anača nii čheriqui lujlsinsqui, nii mazñi žoñž sint'iñi kuz anawali cjiskatzjapa, nižaza niiž kuz ana turwayskatzjapa. Am persun kuzqui walikaz cječhani, ana turwayta. Jalla nuž cjenami amqui nii čheri lulasaž niiqui, am jilž kuz turwayskatasača.

Jalla nii weriž chiižintiquiztan yekjap ančhucaquiztan wejtquiz pewcznačhani, tuž cjican: “¿Kjažtiquiztan amqui nižta chiižinjo? Tsjii žoñiž sint'iñi kuzziz cjenami, čhjulumi paaz atuča, Cristuqui wejr liwriičiča. ³⁰Ima čhjul čherimi lujlcan Yoozquin gracias cjican chiyučha. Jaziqui, ¿kjažtiquiztan

weriž lujltiquiztan žoñej wejtquin uj tjojtunjo?” Nuž cjican, wejtquiz chiyačhani. ³¹ Ančhucaquiz tuž kjaaznuča. Čheri lujlzi, čhjulumi paazmi Yooztajapa honora waytiz waquiziča. ³² Ančhucui anaž jec žoñimi ujquiz tjojtskata, judfo žoñinacami, ana judfo žoñinacami, nižaza Yooz iclizziz žoñinacami. ³³ Wejrzi kjažllami tjapa žoñinacžquiz yanapuča zuma kamañchiz kamajo. Anal wejttajapakaz ojklayuča. Antiz parti žoñinacžtajapa ojklayuča, ninaca ujquiztan liwriita cjeyajo.

11 ¹ Wejrqui jaknužt Jesucristuqui kamtčhaja, jalla nižtazakal kamuča. Nižaza jaknužt wejr kamučhaja, jalla nižtazakaz kama ančhucui.

ACHA CH'OKCHI CUZTURUMPI PUNTU

² Jilanaca cullaquinaca, ančhucui tjapa weriž tjaajintanaca cjuñča, nižaza weriž tjaajintacama kamiñchucča. Jalla nižtiquiztan ančhucaquin felicituča. Ultimu anača wejt kuzquiztan nii tjaajintaqui, antiz, wejtquiz tjaajintatača.

³ Jilanaca, cullaquinaca, persun luctakž mantuquiz žejlča maatakanacaqui. Nižaza zapa luctak žoñiqui Cristuž mantuquiz žejlča. Nižaza Cristuqui Yooz Ejpž mantuquiz žejlča. Jalla nii puntuquiztan ančhucaquiz intintiskatz pecuča.

⁴ Iclizquiz ajcžcu luctak žoñinacaqui pañžtan acha ch'okchi anapanž cjesača, Yoozquin mayizicanami, nižaza Yooziž tjaata taku tjaajincanami. Acha ch'okchižlaj niiqui, persunjapa omobrawillaž cjesača.

⁵ Nižaza iclizquiz ajcžcu, criichi maatakanacaqui panžtan acha ch'okchi panž cjesača, Yoozquin mayizicanami,

nižaza Yooziž tjaata taku tjaajincanami. Acha ana ch'okchinžlaj niiqui, persunjapa ombrawillaž cjesača. Acha ana ch'okchinžlaj niiqui ach chara k'ala murtaž cjes, nižtažtakaz cjesača. ⁶ Iclizquiz ajcžcu, jakzilta maatakat ana acha ch'okchinžlaj niiqui, naaža persun ach chara k'ala murtaž cjila. Nekztan naaqui acha ch'okznasača. Naaža ach chara k'ala murtaž cjen ombrawillaž cjesača. Jalla nižtiquiztan maatakaqui acha ch'okchinpanž cjis waquiziča. ⁷ Yoozqui niž kuzcama luctak žoñi paachiča niž irata cjeyajo. Jalla nižtiquiztan luctak žoñiž cjen Yooztajapa honoraqui tjeeztača. Nižaza maatakaž cjen luctakž honoraqui tjeeztača, jalla nižtiquiztan criichi luctakaqui iclizquiz ajcžcu anapan acha ch'okchi cjis waquiziča. ⁸ Tuquita timpuqui Yoozqui luctaka paachiča, nekztan luctakžquiztan maataka paachiča. Luctakaqui ana maatakžquiztan paatača. ⁹ Nižaza maatakaqui luctakžtajapa paatača. Luctakaqui anača maatakžtajapa paataqui. ¹⁰ Jalla nižtiquiztan maatakanacaqui acha ch'okz waquiziča, luctakž mantuquiz cjican tjeezjapa, anjilanacaž cjen. ¹¹⁻¹² Pero tii tantiya. Cristian kamañchiz cjen luctakanacami nižaza maatakanacami tsjiikazza. Yoozqui luctakžquiztan maataka paachiča. Nižaza luctakaqui maatakaž majtniž cjen žejlča. Pero tjappachaqui Yooziž cjen žejlča. Jalla nižtiquiztan ana maataka žejltčhaja luctakaqui ana žejltasača. Nižaza ana luctaka žejltčhaja maatakaqui ana žejltasača. Nižaza anaj Yooz muntčhaja, anapanž čhulumi žejltasača.

¹³ Ančhucpacha tantiya. Yoozquin mayizican maatakaqui acha ch'okchinžlaj niiqui, čwali cjesaya?

už ñanawali cjesaj? Acha ch'okchi walipankazza maatakžtaqui. ¹⁴Nižaza luctakaqui lajch charchizlaj niiqui persunjapa ombrawillaž cjesača. Jalla nužuča tii wirquiz kamañaqui. Tjapa žoñinacaqui persun kuzquiztan nuž zizza. ¹⁵Nižaza maatakanacaqui pajk charchizlaj niiqui ninacžquizpacha honoraž cjesača. Pajk charchizqui acha ch'okchi cuntača. Jalla nižtiquiztan pajk charchiz cjisqui walikazza maatakžtaqui. ¹⁶Jakziltat nii puntu ch'aas pecčaja, jalla niiqui ziz waquiziča tužu. Wejrnacqui nii cuzturumpi pajzpanča. Nižaza tjapa Yooz iclizziz žoñinacaqui nii cuzturumpi jaru paaspanča.

SANTA CENA PAAZ PUNTU

¹⁷Tsjiižtan zakal chiižinuča. Wejrqui ančucaquiz zumpacha ewjtis waquiziča. Santa Cena paažcu ančhucqui koluculla akžta kamañchiz ulanča tsjan zuma kamañchiz cjenpacha. ¹⁸Iclizquiz ajczcan, ančhucqui t'aka t'aka cjiicjiiñchucquiča. Nii quintu wejtquiz irantžquichiča. Cunamit nižtapan cjiicjiičhani. ¹⁹Pero jalla nižta t'aka t'aka cjitiqiztan, kjanapacha tjeeža, jecnacat ljitum cristian kamañchiz criichinaca, nii. Jalla nižtiquiztan t'aka t'aka cjichuca cječhani. ²⁰⁻²¹Ančhucqui Santa Cena cuzturumpi paazjapa chjeri luli ajczinčhucquiča. Nekztan chjeri lujlcan zapa mayni ančucaquiztan persun čjeri lujlskaz cjissinčhucquiča, ana tojunžcu. Jalla nižtiquiztan koloculla čherchiz žoñinacazti čjeri eecznan žejlchiquiča. Partizti chjeki čjeri lujlchi žejlchiquiča, nižaza yekjapazti mallzilla žejlchiquiča. Ana wali paachinčhucča. Jalla nižtiquiztan anača Jesucristo Jiliriz mantita Santa

Cena cjichuca cjequiča. ²²¿Ančhuczti lujljzapa liczjapa, ana kjuychizčhuc, kjažtatajo? Nižta ana wali paacan, ančuqui tjeeža, ančucaquiz Yooz iclizziz žoñinaca anaž importiča, nii. Nižaza pori criichinacaqui azkatča ana želinchiz cjenacui. ¿Wejr ančucaquiz kjažt cjes? ¿Wejr ančucaquiz “Walikaz” chiyasaya? Anapan nižta chiyasača.

²³Jesucristo Jiliripachača wejtquiz mantichiqui Santa Cena cuzturumpi paajo. Jalla nii tjaajintacama ančucaquiz zakal tjaajinchinča. Ima Jesucristo Jiliriz intirjita cjen, jalla nii weenpacha tsjii t'anta tanziča niž persun kjaržtan. ²⁴Jalla nekztanaqui Yooz Ejžžquin gracias cjican cjichiča. Nekztanaqui t'anta kjolžcu, tojunchiča, tuž cjican: “Tii t'antaqui wejt curpu cuntača. Wejrqui žožž curpuchiz cjen ančhuc laycul ticznača. Weriž ticžta cjuñžjapa tii cuzturumpi wilta wilta paaquiča”. ²⁵Nekztan čjeri lujlžcu nižtapacha Jesucristuqui niž persun kjaržtan tsjii wasu tanziča, tuž cjican: “Tii wasquiz uwas kjazqui wejt ljoc cuntača. Wejt ljoc cjen ew acta tjułžtaž cjequiča. Čhjulator tii cuzturumpi paačaj niiqui, wejtquiz cjuñž waquiziča”. Nuž mantichiča Jesucristuqui. ²⁶Čhjulator tii Santa Cena cuzturumpi paachaj niiqui, ančhucqui tjeeža Jesucristo ticziča ančuca laycu, jalla nii. Jalla nii cuzturumpi paaz waquiziča, Jesucristo Jiliriz tjonzcama.

²⁷Jalla nižtiquiztan jakziltat nii Santa Cena cuzturumpi ana zuma paaquiz niiqui, Jesucristo Jiliriz ombrawillaž cjequiča. Nižaza Jesucristo Jiliriz quintra uj paaquiča; niž curpuquizimi niž ljocquizimi iñartažokaž cjequiča. ²⁸Ima Santa Cena paacan, zapa mayni

persun kuzquiz amayt'asaquiĉha, kjaŝtiquiztan Santa Cena cuzturumpi paa, jalla nii. Nekztan Santa Cena cuzturumpi paasaĉha. ²⁹Niŝaza Santa Cena paacan, Jesucristuŝ uĉhum laycu ticŝta, jalla niĉha zapa mayni persun kuzquiz waljapanŝ cjuñŝ waquiziĉha. Santa Cena paacan Jesucristo ana cjuñziŝ cjequiŝ niĉui, persun casticujapa cjequiĉha.

³⁰Santa Cena cuzturumpi ana wali paatiquiztan, walja anĉucaquiztan laa ŝejlĉha, niŝaza ana wali ŝejlĉha, niŝaza yekjapanacaqui ticziĉha. ³¹Ima Santa Cena cuzturumpi paacan uĉhumnacapacha zapa mayni persun kuzquiz zuma amayt'as waquiziĉha. Nekztan pertuna mayiziz waquiziĉha. Nekztan Jesucristo Jiliriŝ anaŝ casticta cjequiĉha. ³²Jesucristo Jiliriqui uĉhum casticaquiŝ niĉui, azquichjapa panŝ casticĉha, zuma kamañquin cjisnajo. Nekztan ana criichi ŝoñinacŝtan chica ana wiñaya casticta cjequiĉha.

³³Wejt jilanaca, cullaquinaca, ĉhjeri lujlŝjapami niŝaza Santa Cena paazŝjapami ajcŝcu, zapa mayni tjewŝ waquiziĉha parti criichi ŝoñinacaŝ zumpacha ajcŝquiscama. ³⁴Jakziltat ĉhjeri eecskatĉhaja, persun kjuyquin zumpacha lujlŝnaquiĉha, ima iclizquin ojkan. Nekztan lujlŝcu ajcŝquin okaquiĉha, Santa Cena zuma paazŝjapa. Jakziltat Santa Cena ana zuma paaquiŝ niĉui, Yoozqui nii ŝoñi casticaquiĉha. Nuŝulkazza nii puntui. Yekja puntunacaqui wejr azquichaĉha, anĉucaquin cherzñi quejŝcu.

ESPIRITU SANTUŝ TJAATA KAMAÑANACA PUNTU

12 ¹Tŝjii zakaz chiiŝzinuĉha, Espiritu Santuŝ tjaata kamañanaca puntuiztan. Jalla nii anĉucaquiz zuma intintiskatz pecuĉha.

²Tuquiqui ima anĉucaŝ Yoozquin criican anĉucqui ana criiñi ŝoñiŝ paata yooznacŝquiz tŝjii kjutñi irpitataĉha, jalla niŝta irpiskatchinĉhucĉha anĉucqui. Jalla nii anĉucqui zuma zizza. ³Jakziltat Yooz Espiritu Santuŝ irpitaŝlaja, jalla niĉui ana chiyasaĉha: “Jesusaqui laykjita cjila”, cjicanaqui. Niŝaza jakziltat: “Jesusaqui Yooz Jiliriĉha”, cjican chiyachaja, jalla niĉui Espiritu Santuŝ irpitaŝ chiyaquiĉha. Jalla nuŝ intintiskatz pecuĉha.

⁴Jilanaca, cullaquinaca, criichi ŝoñinacaqui yekja yekja Espiritu Santuŝ tjaata kamañanacchizza, niŝaza poderanacchizza. Pero tŝjii Espiritu Santukaz tjapa nii kamañanacami niŝaza poderanacami tjaaĉha. ⁵Niŝaza criichi ŝoñinacaqui yekja yekja Yoozquin sirwiĉha. Pero tŝjii Yooz Jilirŝquinakaz sirwiĉha. ⁶Niŝaza criichinacaqui yekja yekja wali obranaca paaĉha. Pero tŝjii Yooz Ejpkaz criichinacŝquiz nii obranaca paakatĉha. ⁷Jaziqui tjapa criichinacaqui Yooz Espiritu Santuŝ tjaata kamañchizza, parti criichinacŝquiz juc'ant zuma kami yanapŝjapa. ⁸Tiŝta kamañanacaqui tjaataĉha: Espiritu Santuqui yekjap criichinacŝquiz zuma pinsita razunanacchiz chiikatĉha. Niŝaza Yooz Espiritu Santuqui yekjap criichinacŝquiz zizñi zizñi chiikatĉha. ⁹Niŝaza Espiritu Santuqui yekjap criichinacŝquiz Yoozquin juc'ant tjapa kuzziz cjiskatĉha, zuma obranaca paazŝjapa. Niŝaza Espiritu Santuqui yekjap criichinacŝquiz poder tjaaĉha laanaca ĉhjetnajo. Pero Espiritu Santuqui tŝjiiakazza. ¹⁰Niŝaza Espiritu Santuqui yekjap criichinacŝquiz poder tjaaĉha wali milajrunaca paazŝjapa. Niŝaza Espiritu Santuqui yekjap

criichinacžquiz poder tjaacha, Yooziž tjaata takunaca zuma kjanzt'izjapa. Nižaza Espiritu Santuqui yekjap criichinacžquiz zizni kuz tjaacha, žoñinacaž chiita takunaca zumpacha tantiizjapa, Yoozquiztan tjonchižlan už zajrižquiztan tjonchižlaj, jalla nii. Nižaza Espiritu Santuqui yekjap criichinacžquiz ana pajta taku chiikatča. Nižaza nii Espiritu Santupacha yekjap criichinacžquiz zizni kuz tjaacha, nii ana pajta chiita taku parti criichinacžquiz intintiskatajo. ¹¹ Tsji Espiritu Santukaz tjapa nii yekja yekja poderanaca tjaacha. Jaknužt nii Espiritu Santuqui tjaaz munčhaja, jalla niicama tjapa criichinacžquiz tjaacha.

CRIICHI ŽOÑINACAQUI TSJIIKAZZA

¹² Cristužtan niizquin criichi žoñinacžtan tsjii curpuchiz žoñižtakazza. Tsjii žoñta žejlča, kjarami, lismi, čhujcquimi, cjuñimi, jalla nižtanaca žejlča, pero tsjii žoñikazza. Wacchi cjenami tsjii curpukazza. Jalla nižta iratača Cristužtan criichinacžtan. ¹³ Criichinacaqui yekja yekja žejlča, judionacami, yekja wajtchiz žoñinacami, piyunanacami, ana piyunanacami, jalla nižtanaca žejlča. Pero bautistaž cjistanaqui Espiritu Santuž cjen tjapa nižta criichinaca tsjii žoñž curpu cunta cjissiča. Nižaza Yooz Ejpqui tjapa criichinacž kuzquizimi Espiritu Santo luzkatchiča.

¹⁴ Tsjii žoñžtaqui kjarami lismi achami čhujcquimi cjuñimi jalla nižtanaca žejlča. Punta punta žejlča tsjii žoñž curpuquiziqui. ¹⁵ Jalla nižta iratača Cristužtan niizquin criichinacžtan. Jalla nižtiquiztan tjapa Cristužquin criichinacaqui tsjiikazza. Jilanaca, cullaquinaca, nonžna. Tsjii

žoñž kjojchaqui ana chiiz waquiziča, tuž cjican: “Wejrqui kjojchakazza, anača wejr kjaraqui; jalla nižtiquiztan anaž tii žoñž curpuquiz želasača”. Jalla nižta chiižcumi, nii kjojchaqui tirapanča nii žoñž curpu partiquizqui. ¹⁶ Nižaza tsjii žoñž cjuñiqui ana chiiz waquiziča, tuž cjican: “Wejrqui cjuñikazza, anača wejr čhujquiqui. Jalla nižtiquiztan anaž tii žoñž curpuquiz želasača”. Jalla nižta chiižcumi, nii cjuñiqui tirapanča nii žoñž curpu partiquizqui. ¹⁷ ¿Tjapa žoñž curpuqui čhujquicamažlaj niiqui, kjažt nonžnasajo? ¿Nižaza tjapa žoñž curpuqui cjuñicamažlaj niiqui, kjažt mucžnasajo? ¹⁸ Yoozqui žoñž curpuquiz punta punta utčiča, jaknužt munčhaja, jalla nuž. Jalla nižta irata Yoozqui punta punta Espiritu Santuž kamañanacami nižaza poderanacami tjaachiča criichinacžquiz. ¹⁹ Žoñž curpuquiz anaj punta punta žejlčhaja, anaž ultim žoñž curpu cjitasača. ²⁰ Punta punta želanami, tsjii curpukazza. Jalla nižta irata criichinacaqui punta punta poderanacchizza, nižaza kamañanacchizza, pero tjapa criichinacača Yooz partiquiz, nižaza tsjiikazza.

²¹ Jalla nižtiquiztan čhujquiqui kjaržquiz ana chiiz waquiziča, “Amqui anal pecuča”, cjicanaqui. Nižaza achaqui kjojchquiz ana chiiz waquiziča, “Amqui anal pecuča”, cjicanaqui. Nižaza tsjii criichi žoñiqui yekja criichi žoñžquiz ana chiyasača: “Amqui anal pecuča”, cjicanaqui. ²² Žoñž curpuqui punta puntaž pecča. Jaziqi žoñž curpuquiz jallc'a partiqui zaka žejlča. Nii jallc'a partiqui juc'antiž pecča. ²³ Nižaza žoñž curpuquiz ana zuma chercherchiznaca žejlča. Ninacaqui zquitžtan tjutžtača

zuma chercherchiz cjisjapa. Nižaza žoňž curpuquiz chjojžta partinaca žejlčha. Ninacaqui zquitžtan tjutžtačha, učhum ana azjapa. ²⁴ Zuma chercherchiznaca tsjii zquiti tjutzqui anaž pecčha. Yoozqui žoňž curpu nižta paachičha. Nižaza Yoozqui žoňž kuz peckatchičha, ana zuma chercherchiznaca tsjii zquitžtan zuma tjutzjapa. Jalla nižta iratačha iclizziz žoňinacaqui. ²⁵ Jalla nižta munchičha Yoozqui, criichi žoňinacaž ana t'aka t'aka cjisjapa. Nižaza Yoozqui nižta munchičha, porapat zuma munaziñi kuzziz yanapasjapa. ²⁶ Tsjii criichi žoňiž sufran, tjapa criichinacaqui kuzquiz sint'ičha. Nižaza tsjii criichi žoňiž honorchiz cjen, tjapa criichinacaqui niižtan chica chipčha.

CRIICHI ŽOÑINACŽ KAMAÑ PUNTU

²⁷ Jilanaca, cullaquinaca, tjapa Yoozquin criichinacžtan Cristužtanpacha tsjii kuzzizza. Zapa mayni ančhucqui Jesucristuž partiquiz žejlčha. ²⁸ Nižtiquiztan Yooz Ejpqui criichinacžquiz yekja yekja kamañanaca tjaachha, iclizziz žoňinacžquiz yanapzjapa. Primiraqui Yoozqui yekjap criichinacžquiz apóstol kamaña tjaachičha. Niiž jaru Yooziž tjaata taku paljayz kamaña tjaachičha yekjap criichinacžquiz. Niiž jaru Yoozqui niiž taku tjaajinz kamaña tjaachičha yekjap criichinacžquiz. Nižaza Yoozqui milajru paaz poder tjaachičha. Nižaza Yoozqui poder tjaachičha laanaca čhetnajo. Nižaza Yoozqui icliz langzquiz yanapz kamaña tjaachičha. Nižaza Yoozqui kamaña tjaachičha iclizziz žoňinacžquiz irpiñijapa. Nižaza Yoozqui poder tjaachičha, ana pajta takunaca chiichiyajo. ²⁹ Anačha tjapa ančhucqui apóstol kamañchizqui. Nižaza anačha

tjapa ančhucqui Yooziž tjaata taku paljayz kamañchizqui. Nižaza anačha tjapa ančhucqui Yooz taku tjaajinz kamañchizqui. Nižaza anačha tjapa ančhucqui milajru paaz poderchizqui. ³⁰ Nižaza anačha tjapa ančhucqui laanaca čhetinz poderchizqui. Nižaza anačha tjapa ančhucqui ana pajta takunaca chiiz poderchizqui. Nižaza anačha tjapa ančhucqui nii ana pajta chiita takunaca intintiskatz poderchizqui. ³¹ Ultim zuma kamañquiz kuz tjaa ančhucqui. Nižaza wejrqui ančhucquiz nii juc'ant zuma kamañal tjaajnučha.

ZUMA MUNAZIZ KAMAÑAQUI JUC'ANT ZUMAČHA

13 ¹ Jalla tužučha juc'ant zuma kamañaquei. Zuma munaziz kamañaquei juc'ant zumačha tjapa kamañanacquiztanaquei. Tsjii žoñiquei ana pajta žoňž takunacami nižaza anjilž takunacami chiyasačha. Jalla nižta chiichiž cjenami ana zuma munaziñi kuzziz cječhaj niiqui, jalla nii žoñiquei inapachaž chiyaquei. Ina takukaza nii žoňž takuqui. Tsjii ina wjajtta cazažtakaz cjesačha. ² Nižaza tsjii žoñiquei Yooziž tjaata takunaca paljayasačha; nižaza tjapa Yooz pinsitanaca zizasačha; nižaza tjapa Yooz puntu zizasačha. Pero ana zuma munaziñi kuzziz cječhaj niiqui, anaž čhjulumi cjequičha Yooz yujcquiziqui. Nižaza tsjii Yoozquin tjapa kuzziz žoñiquei Yoozquiztan mayizichiž cjen, tsjii curumi kiskatasachha. Pero jakziltat ana zuma munaziñi kuzziz cječhaja, jalla niiqui čhulu parlizcumi zizcumi paazcumi anaž čhjulumi cjequičha Yooz yujcquiziqui. ³ Nižaza tsjii žoñiquei tjapa niiž želinchiznaca tojnasaž niiqui, nižaza Cristuž cjen persun curpumiž ujta cjisjapa intirjasaž

niiqui, pero ana zuma munaziñi kuzziz cjeĥaja, jalla niiqui ĥjulu paazcumi inakaz cjesaĥa nii persunaltajapa.

⁴ Zuma munaziñi kuzziz ŷoñiqui tiŷta kuzzizza. Pazinziz kuzzizza, niŷaza okzñi kuzzizza, niŷaza ana inñiŷi kuzzizza, niŷaza ana persun kamaña alawasñi kuzzizza, niŷaza ana mit kuzzizza. ⁵ Niŷaza ana atinar kuzzizza, niŷaza zuma munaziñi kuzziz ŷoñiqui ana malcriat kuzzizza. Niŷaza persun kuzcamakaz anaŷ kamz pecĥa. Niŷaza ana ŷawjñi kuzzizza. Niŷaza ana anawal ayñi tjepuns kuzzizza. ⁶ Niŷaza tsjii jilaŷ ujqiz tjojtsi cjenauqi, anaŷ ĥipasaĥa zuma munaziñi kuzziz ŷoñiqui. Antiz tsjii jilaŷ zuma paachi cjenauqi, nekztan ĥipsnasaĥa.

⁷ Ĥjul pruebanaca tjonanami zuma munaziñi kuzziz ŷoñiqui awantiĥa. Niŷaza zuma munaziñi kuzziz ŷoñiqui parti criichinacŷ puntuquiztan persun kuzquiz cjiĥa; “Zuma kuzzizlan”, cjican. Niŷaza zuma munaziñi kuzziz ŷoñiqui parti criichinacŷ puntuquiztan persun kuzquiz: “Zuma kamaĥan”, cjiĥa. Niŷaza ĥjul pruebanacaŷ tjonanami Yoozquin tjurt'iñi kuzziz cjequiča zuma munaziñi kuzziz ŷoñiqui.

⁸ Nii zuma munaziz kamañaqui anawira tucuzinznaquiča. Nii Yooziŷ tjaata taku paljayz kamañaqui tucuzinznaquiča; niŷaza nii ana pajta taku ĥiiz kamañaqui zakaz tucuzinznaquiča. Niŷaza nii Yooz puntu zumpacha zizta paljayz kamañaqui panŷ tucuzinznaquiča. ⁹ Tii muntuquiz ŷejlcanaqui Yooz puntuquiztan anapanŷ tjappacha zizi atasāĥa. Niŷaza Yooz puntuquiztan anapanŷ tjappacha intintiskati atasāĥa. ¹⁰ Wiruñauqi Yooztan kamcanaqui Yooz puntu tjappacha zizaquiča. Jalla nii timpuqui Yooz

puntu tjaajinz kamañanacaqui kataquiča.

¹¹ Jalla tiŷta irataĥa Yooz puntu zizqui. ŷoñiqui kolta uza cjicanaqui, ocjal ĥiichiiz ĥiiniĥa, niŷaza ocjal pinsi pinsiñiĥa, niŷaza ocjalŷ pinsamintuchiz tantiñiĥa. Jalla niŷta ŷejltaĥa ocjala cjicanaqui. Jazizti pajk ŷoñi cjisququi, ocjalaŷtakaz ĥiichiiznacami, pinsiznacami jaytitaĥa. Jalla niŷta irataŷ Yooz puntunaca zizqui. ¹² Zur ispijquiz persun yujcqui ana zuma kjanaŷ tjenĥa. Jalla niŷta irataĥa anziqiu Yooz puntunaca zizqui, ana kjana. Wiruñauqi Yooztan kamcan zuma kjanaŷ zizaquiča Yooz puntuqui. Anziqiu anaŷ tjappacha zizzuca Yooz puntuqui. Wiruñauqi Yooztan kamcan tjapa Yooz puntunaca zizaquiča, jaknuŷt Yoozqui uĥum puntuquiztan zumpacha zizzaja, jalla niŷta.

¹³ Ultimquiziqui criichi ŷoñinacaqui Yoozquin tjapa kuzziz wiñaya cjequiča. Niŷaza criichinacaqui Yoozquiztan zumanaca niiz jaru niiz jaru tjewznaquiča. Niŷaza criichinacaqui zuma munaziñi kuzziz wiñaya cjequiča. Pero tsjiiĥa ĥekan waliqiu, zuma munaziñi kuz, jalla nii.

YOOZ TAKU PALJAYZ KAMAÑA PUNTU

14 ¹ Jalla niŷtiquiztan zuma munaziz kamañquiz kuz tjaa. Jalla nii kamañaĥa juc'ant ĥekanaqui. Niŷaza Yooz Espíritu Santuŷ tjaata kamañanacquiz kuz tjaa. Yooz taku paljayz kamañquiz juc'anti kuz tjaa. ² Nii anaŷ pajta taku ĥiiz kamañauqi anaĥa ĥekanaqui. Nii kamañĥiz ŷoñiqui Yoozquizkaz ĥiichiĥa. Anaŷ ŷoñizquiziqui ĥiichiĥa. Jalla nuŷ ana pajta taku ĥiyan parti ŷoñinacaqui anaŷ intintazi atĥa.

Espíritu Santuqui ana zizta chjojžta taku paljayzkatčha nii ana pajta taku chiiñi žoñžquiz. ³Pero nii Yooz taku paljayñi žoñiqui parti criichinacžquiz paljayčha, juc'ant zuma kamajo, nižaza Yoozquin tjurt'iñi kuzziz cjejajo, nižaza kuzta cjejajo. ⁴Nii ana pajta taku chiiñi žoñiqui persunjapakaz yanapčha Yoozquin juc'anti kuzziz cjisjapa. Nii Yooz taku paljayñi žoñizti parti criichinacžquiz yanapčha Yoozquin juc'anti kuzziz cjejajo.

⁵Wejrqui ančhucaquiz cjiwčha, tjapa ančhucqui ana pajta taku chiiichiñi cjičhaja. Pero juc'ant chekanaqui, Yooz takunaca paljayñiž cjičhaja, jalla nižta anchal pecučha. Nii Yooz takunaca paljayz kamañchiz žoñičha juc'ant chekanaqui nii ana pajta taku chiiichiiz kamañchiz žoñžquiztanaqui. Jalla nižtiquiztan ana pajta taku chiiichižcu, parti criichinacžquiz intintiskatz waquizičha Yoozquin juc'anti kuzziz cjejajo.

ANA PAJTA TAWKŽTAN PALJAYZ KAMAÑA PUNTU

⁶Jilanaca, cullaquinaca, ančhucaquiz tjonžcu ana pajta tawkžtan paljayaž niiqui, nii paljaytaqui inakaz cjequičha ančhucaquiz. Ana yanapasačha tsjan zuma kamañchiz cjejajo. Ančhucaquiz yanapzjapa, wejtlaqui kjanapacha paljaystančha, tsjii Yooziž tjaata ew takumi, tsjii Yooz puntu zizta takumi, tsjii Yooziž intintiskatta takumi, tsjii Yooz puntu catokta takumi, jalla nii. Nekztan ančhucqui yanaptaž cjequičha, Yoozquin juc'anti kuzziz cjisjapa.

⁷Tsjii pincallu pjujñi žoñiqui čhjakčhjakauiz niiqui, nii pjujta wirsu ana pajta cjequičha. Nižaza pincallu pjujñinacami quitara icñinacami čhjul musicunacami tsjii wirsu ana kjanapacha tejlznaquiz niiqui, parti

žoñinacazti čhjul wirsut pjujčhaja, icčhaja, anaž tantiyi ataquičha. Jalla nižta iratačha ana pajta tawkžtan chiiizqui. ⁸Tsjii quira zalzjapa trompetaż ana zuma claro tjawunaquiz niiqui, jalla nuž ana zuma tjawuntiquiztan zultatunacaqui anaž listu tjaczi cjequičha nii quirajapaqui. ⁹Jalla nižta irata zakaz ančhucaquiz watčha. Tsjii criichi žoñiqui ana intintazuc takuž paljayaquiz niiqui, ančhucqui ana intintichiz cjequičha, čhjulut chiičhaja, jalla nii. Jakziltat ana intintazuc takuž chiičhaj niiqui, inakaz chiičha. ¹⁰Tii muntuquiz tjapaman takunacapanž žejlž, jaz. Nižaza zapa takuqui intintitaž cjesačha jakziltižquizimi. ¹¹Pero wejrqui tsjii chiita taku anal intintasaž niiqui, niwjtanaqui yekja wajtchiz žoñižtakaztčha nii chiiñi žoñžquiztanaqui. Nižaza nii yekja taku chiiñi žoñiqui wejtquiztan yekja wajtchiz žoñižtazakazza. ¹²Ančhucaquiz nižtazakazza. Ančhucqui Espiritu Santuž tjaata kamañanacami ancha tanz pequiñčhucčha. Jalla nižtiquiztan ančhucqui tsjan chekan kamañanacquiz kuz tjaaz waquizičha, parti criichinacaz Yoozquin juc'anti kuzziz cjejajo.

¹³Jalla nižtiquiztan jakziltat ana pajta taku chiyachaja, Yoozquin mayiziz waquizičha, niiž chiita taku zuma intintiskatzjapa parti criichinacžquiz. ¹⁴Nižaza wejrqui ana pajta tawkžtan Yoozquin mayizaž niiqui, wejt animukaz mayaquičha. Wejt kuzpacha anaž intintičha. Jalla nižtiquiztan inakaza wejt kuzqui. Ana čhjul provechumi jwesasačha. ¹⁵¿Jalla nuž cjenauki kjažt cjes wejrqui? Kuztanami animužtanami Yoozquin mayiziz waquizičha. Nižaza kuztanami animužtanami Yooz wirsu

its waquiziĉha. ¹⁶Animukaz ana pajta tawkĉtan Yoozquin gracias cjican chiyasaĉha. Pero jalla nuĉ chiyan parti nonznĉi Źoĉinacaqui anaĉ intintazi atasasĉha. Jaziqui: “Amĉn. Jalla nuĉoj cjila”, cjican ana kjaaznĉi atasasĉha.

¹⁷Ana pajta chiita orasunaqui walikaz cjesasĉha, Yoozquin gracias cjicanaqui. Pero nii orasunaqui parti criichinacĉquiziqui anaĉ yanapĉha, Yoozquin juc'anti kuzziz cjeyajo.

¹⁸Wejrqui ana pajta tawkĉtan juc'anti chiyuĉha tjapa anĉhucaquiztan. Jalla niĉtiquiztan Yoozquin gracias cjican chiyuĉha. ¹⁹Jalla nuĉ cjenami parti criichinacĉtan ajcĉcu, wejrqui nii parti criichinacĉquiz tjajinz pecuĉha. Jaziqui ana pajta tawkĉtan anal chiiz pecuĉha. Jalla nuĉ chiyan parti criichinacaqui anaĉ tantiyi atasasĉha. Jalla niĉtiquiztan iclizziz Źoĉinacĉtan ajcĉcu pjjska intintita takunaca chiiz pecuĉha, tunca waranka ana pajta takunacquiztan.

²⁰Jilanaca, cullaquinaca, pruebaĉ tjonan, anapan uj paa. Antiz zuma pinsiĉiz cjee. ²¹Cjijrta Yooz takuqui, tuĉ cjĉha: “Wejrqui yekja wajtchiz Źoĉinacĉquiz paljayskataĉha. Ninacaqui ana intintazzuc tawkĉtan tii wajtchiz Źoĉinacĉquiz paljayaquĉha. Niĉta ana pajta taku nonĉcanami tii wajtchiz Źoĉinacaqui anaĉ wejtquin kuzziz cjequĉha. Jalla nuĉ cjĉha Yooz Jiliriqui”. ²²Ana pajta takunaca paljayanaqui jalla nii chiita takuqui ziĉnalaĉtakaz cjequĉha, ana criichi Źoĉinacĉquiziqui. Nii ana intintazzuc takunacaqui anaĉha criichi Źoĉinacĉtajapa. Yooziĉ tjata takuĉ jalla niĉha criichi Źoĉinacĉtajapaqui. Nii takuqui anaĉha ana Yoozquin criichi Źoĉinacĉtajapaqui. ²³Tjapa criichi Źoĉinacĉtan ajcziĉ cjen tsjii ana criichinacaqui luzasasĉha. Nekztan, ana

pajta takunacakaz chiiĉi nonznaquĉiĉ niiqui, ninacaqui criichi Źoĉinacĉquiz chersnaquĉĉha lucurat Źoĉinacaĉtakaz.

²⁴Pero criichinacaqui Yooziĉ tjata takunacakaz paljayaquĉiĉ niiqui, nekztan nii ana criichi Źoĉinacaqui persun kuzquiz sint'aquĉĉha. Yooz taku paljaytaĉ cjen, nii ana criichi Źoĉinacĉ ujnaca tjeeĉtaĉ cjequĉĉha. Nii criichinacĉ chiita takunaca nonĉcu persun kuzquiz amayt'asaquĉĉha, nekztan persun ana zuma kamtaĉ pajaquĉĉha. ²⁵Jalla nuĉ ninacaĉ chjojzaca uj paatanacaqui tjeeĉtaĉ cjequĉĉha. Jalla niĉtiquiztan quillĉcu, werar Yoozquin macjatasasĉha, niĉzquin sirwizjapa. Nekztan chiyaquĉĉha; “Yoozqui anĉhucatankalĉha”, cjicanaqui.

CULTO PAAZ PUNTU

²⁶Jilanaca, cullaquinaca, iclizziz Źoĉinacĉtan ajcĉcan, jalla tuĉ waquiziĉha. Yekjapanacaqui Yooz wirsu tjajnasasĉha. Yekjapanacazti tsjii zuma taku tjajnasasĉha. Yekjapanacazti tsjii Yooziĉ tjata taku intintiskatasasĉha. Yekjapanacazti ana pajta taku paljayasasĉha. Yekjapanacazti nii ana pajta chiita taku zumpacha intintiskatasasĉha. Jalla niiqui walikazza. Pero tjapa chiita takunacaqui criichinacĉquiz yanapz waquiziĉha, Yoozquin juc'anti kuzziz cjeyajo. ²⁷Nii ana pajta taku paljaynĉi Źoĉiqui tsjii pucultan ĉjepultanĉ nuĉ cjesasĉha. Niĉaza niĉi jaru niĉi jaru turnasasasĉha. Niĉaza ninacĉ chiita taku intintiskatta cjis waquiziĉha. ²⁸Intintiskatnĉi Źoĉi ana Źelaquĉiĉ niiqui, nekztan ana pajta takunaca ana chiiz waquiziĉha. Pero nii ana pajta taku chiiĉi Źoĉinacaqui persun kuzquiz paljayasasĉha, Yoozquinami. ²⁹Niĉaza nii Yooz takunaca paljaynĉi Źoĉinacaqui tsjii pucultan ĉjepultanĉ nuĉ cjesasĉha.

Parti criichinacaqui ninacž chiita taku zumpacha tantiyaquičha, werara ana werara paljayñi, jalla nii. ³⁰Yoozqui tsjii julzi žoñžquiz taku tjaaquizñi, nekztan nii ora chiñiqui nužquiz apatatasachha, niž chiizquiztan. ³¹Jilanaca, cullaquinaca, paljayñi žoñinacaqui niž jaru niž jaru paljayz waquizičha, parti criichinacaz Yooz taku zumpacha zizajo, nižaza juc'anti Yoozquin kuzziz pek'inchayta cjeayajo. ³²Nii Yooz taku paljayñi žoñinacaqui persun kuzquiz zuma ewjas waquizičha, niž jaru niž jaru paljayzjapa. ³³Iclizquiziqui Yoozqui anaž tsjiiza tsjiiza arañi pecčha. Iclizziz žoñinacžtan ajcžcu zuma lijituma Yoozquin rispita. Zuma walikaz ajcz waquizičha. Jalla nuž pecčha Yoozqui.

Jalla tuž criichi žoñinacaqui ajczñipančha tjapa wajtquiziqui. ³⁴Nižaza iclizquiziqui maatak criichinacaqui ch'ujupanž želasačha, anaž chiiz waquizičha. Nižaza maatak criichinacaqui luctakž mantuquiz cjistančha. Jalla nuž cjičha cjiřta Yooz takuqui. ³⁵Maatakaqui tsjii puntu ana zuma intintičhaj niiqui, kjuyquin persun luctakžquiz pewcznaquičha zuma intintizjapa. Nii ajcztiquizpacha ana pewcznaquičha, criichinacžtajapa ana ombrawillta cjeayajo.

³⁶Ančhucqui nii tjaajinta jaru kamz waquizičha. Yooz takuqui ančhucquiztan anaž kalltičha. Nižaza anačha ančhuc alajquizkaz Yoozqui taku tjaachiqui. Weriz tjaajintacama kamčha tjapa iclizziz žoñinacaqui. ³⁷Jakziltat Yooz taku paljayz kamañchiz cječhaja, nižaza jakziltat Espiritu Santuž tjaata kamañchiz cječhaja, jalla ninacžlaqui tii weriz cjiřta taku pajstančha. Jalla tii takučha Yooz

Jilirž mantitaqui. ³⁸Jakziltat tii weriz cjiřta taku ana pajz pecčhaj niiqui, parti criichinacaqui nii žoñžquiz anaž pajaquičha. Nii žoñiqui anapanž Espiritu Santuž tjaata kamañchizqui.

³⁹Wejt jilanaca, cullaquinaca, tužučha chekanaqui. Yooz takunaca paljayz kamañquiz kuz tjaa. Pero tsjii žoñiqui ana pajta tawkžtan chiyaquizñi, jalla nii chiñi žoñžquiz anaž atajz waquizičha. ⁴⁰Jilanaca, cullaquinaca, iclizquiziqui zuma jurmali cultu paaz waquizičha, nižaza ajcztiquiz paljayñinacaqui niž jaru niž jaru chiiz waquizičha.

JESUCRISTUŽ JACATATTA PUNTU

15 ¹Jilanaca, cullaquinaca, weriz tjaajinta takunaca cjuñskatz pecučha. Wejrqui werar liwriñi Yooz taku tjaajinchinčha. Nižaza weriz tjaajintanaca nonžcu ančhucqui catokchinčhucčha; nižaza nii tjaajintacama kamzjapa tjup kuzzizčhucčha. ²Nižaza liwriñi Yooz taku tiraž catokaquizñi, nii liwriñi Yooz takuž cjen ančhucqui tsjan tsjan ujnacquiztan liwriita cjequičha, tsjan zuma kamzjapa. Juñta kuzquizkaz catokchižlaj niiqui, nii juntuñallakaz catoktiquiztan ultimu ana liwriitaž cjequičha.

³Wejrqui ančhucquiz juc'ant chekan takunaca tjaajinchinčha. Tuquiqui wejtquiz zakaz nii zuma takunacaqui tjaajintatačha. Jalla tužučha nii tjaajinta takunacaqui. Jesucristuqui učhum uj laycu ticzičha. Jaknužt Yooz tawk liwruquiz cjiřtatažlaja, jalla nii cjiřta jaru cumplissičha. ⁴Nekztanaqui Jesusiž curpuqui tjažtatačha. Nekztanaqui nuž tjažtiquiztan čhjep majquiztan ticziquiztan jacatatchičha. Jaknužt Yooz tawk liwruquiz tuquitan cjiřtatažlaja,

jalla nii jaru cumplissicha.

⁵Jacatat̄zcu Jesucristuqui Pedruzquiz parizichīcha. Nekztanaqui niiz̄ illzta apostolanac̄quiz parizichizakazza.

⁶Nekztanaqui niiz̄ wiruñ pjijska patac jilanac ajcziquiz parizichizakazza.

Jila parti ninacaqui tira žejt̄cha, tsjii kjažta žoñinacakaz ticziqui. ⁷Niiz̄ wiruñ Jacobžquiz parizichizakazza.

Nekztanaqui tjapa niiz̄ illzta apostolanac̄quiz parizichizakazza.

⁸Ultimquiziqui wejtquiz zakaz parizichīcha. Wejrqui parti apostolanac̄quiztan wirwirilla Yooz partiqui luzzin̄cha. ⁹Wejrqui parti apostolanac̄quiztan ana ancha waquizūcha. Tuquiqui wejrqui

Yoozquin criichinac̄z quintraj ojklayin̄tācha. Jalla nižtiquiztan anatācha Cristuž apóstol c̄jita c̄jichuca. ¹⁰Yooz wejtquiz okz̄niž c̄jen, wejrqui apóstol kamañquiz uchtit̄cha. Pero ana ina Yoozqui wejr utchīcha. Wejrqui apóstol kamañquiz

juc'anti jilacami langzin̄cha nii parti apostolanac̄quiztan. Nii langztiquiztan wejrqui ana honorchiz c̄jichucācha, Yoozza honorchizqui. Yoozqui wejtquiz wali yanapchīcha, apóstol kamañquiz zuma cumplisjapa. ¹¹Nužulkazza nii puntuqui.

Chekpachācha wejrnacqui an̄chucaquiz liwriiñi Yooz taku paljaychintqui. Jaziqui an̄chucqui nii liwriiñi taku tjapa kuztan catokchin̄chuc̄cha.

ŽOÑINACAQUI JACATATAQUIČHA

¹²Jaziqui wejrnacqui tjaainchin̄cha, Jesucristuqui ticziquiztan jacatatchi, jalla nii. Yekjap an̄chuc̄tzi chiiñīcha: “Žoñinacaqui tic̄zcu ana jacatatāsācha”. ¿Kjažta nižta c̄jesajo? ¹³Ticziquiztan ana jacatattasaž niiqui, Jesucristuqui anapaj jacatatchi c̄ječhani. ¹⁴Nižaza Jesucristo ana jacatatchižlaj niiqui,

jalla nižtiquiztan wejrnacaž paljayta liwriiñi taku nuž c̄jenaqui inapankat c̄ječhani. Nižaza an̄chuca Cristužquin criichi kamañac̄qui inapanzakat c̄ječhani. ¹⁵Wejrnacqui “Yoozqui Cristo jacatatskatchīcha” jalla nuž c̄jiwchiya. Ana jacatatchižlaj niiqui, wejrnacqui toscar tisticužtakazlani Yooz puntuquiztanani. Ticzi žoñinacaqui ana jacatattasaž niiqui, Yoozqui Jesucristo anapaj jacatatskatchi c̄ječhani. ¹⁶Ticzi žoñinacaqui ana jacatattasaž niiqui, Jesucristupacha anapaj jacatatchi c̄ječhani. ¹⁷Nižaza Jesucristuqui anapan jacatatchižlaj niiqui, an̄chucaž niiz̄quin tjapa kuztan criitaqui inapankat c̄ječhani. An̄chuca ujquiztan anapan liwriita c̄ječhani. ¹⁸Nižaza Jesucristužquin criichi ticzi žoñinacaqui ninac̄z ujchiz c̄jen casticta c̄ječhani. ¹⁹Jesucristužquin criichinacaqui ultim liwrii ora tjewža. Nii tjewzqui inakazlaj niiqui, ūchumqui ana criichi žoñinac̄quiztan juc'anti incalltaž c̄ječhani.

²⁰Pero ultim werara Jesucristuqui ticziquiztan jacatatchipan̄cha. Jalla nīīcha primir ticziquiztan jacatatchi žoñiqui, primira pookchi zkala ricujtažtakazza. ²¹Primirquiztanpacha tsjii žoñiž uj paachiž c̄jen, tjapa žoñinacaqui ticstan̄cha. Jalla nižtakaz tsjii žoñiž c̄jen tjapa Jesucristužquin criichi žoñinacaqui jacatataquīcha, Yooztan wiñaya kamzjapa. ²²Adán c̄jita žoñiž c̄jen tjappachaž tic̄ža, jalla nižtakaz Jesucristo c̄jita žoñiž c̄jen tjapa niiz̄quin criichi žoñinacaqui jacatatskatta c̄jequīcha. ²³Nižaza tjapa criichinacaqui jaknužt Yooz mun̄chaja, jalla niicama jacatatskatta c̄jequīcha. Jesucristo, nīīcha primiraqui. Nekztan Jesucristuž tjonz tjuñquiziqui niiz̄ parti žoñinacaqui jacatataquīcha. ²⁴Jalla niiz̄ wiruñ niiz̄

parti žoñinacaž jacatattiquiztan, tii muntuquiz tucuzinzaquičha. Nekztan tjapa Jesucristuž quintrá jilirinacami, nižaza niiž quintrá mantiñinacami, nižaza niiž quintrá azziznacami, jalla tjappacha liwj tjabatāž cjequičha. Jalla nekztanaqui tjapa mantizqui Yooz Ejpžquin intirjitaž cjequičha. ²⁵Pero anziqui Cristuqui tira mantistančha niiž quintrarionaca liwj atipscama. Niiž quintranaca tjewcžtažokaz cjequičha. ²⁶Ultimquiziqui ticzqui atiptaž zakaz cjequičha. Ticzqui ana iya želaquičha. ²⁷Yoozqui Cristo utchičha tjappacha mantizjapa. Yooz Ejpkazza ana Cristuž mantuquiz žejlčha. Jalla nii puntu kjanačha. Tjapa nekztanaqui Cristuž mantuquiz žejlčha. ²⁸Yoozqui Jesucristo utchičha, tjappacha mantizjapa. Ultimquiziqui Jesucristo Yooz Majchqui tjapa tii muntuquiz žejlñinacami atipžcu, niipchaž Yooz Ejpž mantuquiz cjequičha. Yooz Ejpčha wiñaya juc'ant chekanaqui cjequičha, tjappachquiztanaqui.

²⁹Tsjiilla cjesačha, jacatatz puntuzakaz. Ančhucaltaž tsjii cuzturmipi žejlčha, criichi žoñiqui ima bautistan, ticziž cjen, žejtñi criichi žoñiqui nii ticzi criichiž cuntiquiztan bautismo tanzñičha. Ticziquiztan ana jacatatchi cječhaja, ¿Kjažtiquiztan nižta paa ančhucjo? ¿Čhjuljapa bautismo tanžjo? ¿Ticzi žoñž cuntiquiztanajo?

³⁰Nižaza ticziquiztan ana jacatatchi cječhaj niiqui, ¿Kjažtiquiztan wejrnacqui zapuru sufrican Yooz taku paljayz kamañquiz tira ojklajojo?

³¹Apóstol kamañquiz ojklayan anchucqui Jesucristo Jiliržquin criichinčhucčha. Jalla nuž cjen cuntintuž wejrqui. Jalla nuž chiican werar razunal chiyučha. Nižaza zapuru wejrqui ticz llaquizican

želučha, apóstol kamañquiz ojklaycan. Jilanaca, jalla nuž chiican, werar razunal chiyučha. ³²Wejrqui Efeso cjeta wajtquin preso cjicanaqui anawal q'uit animalanacžtan kichjaskattatačha. Ticziquiztan anažlaja jacatatñi niiqui, weriž nuž sufritaqui inakat cječhani. Ana criichi žoñž pinsita jaru inapankazza weriž sufritaqui. Ninacaqui tuž cjiñičha: “Lujlžla, licžla, jaka kat učhumqui ticznačhan”, jalla nuž cjiñičha ana criichi žoñinacaqui. Ticziquiztan ana jacatattasaž niiqui, nuž cjiñi žoñinacaqui zuma razunchiztakat chiičhani. Pero ultimó žoñinacaqui jacatataquičha.

³³Jaziqui ančhucqui anaž incallskata. Ana zuma kamañchiz mazinacchizčhucčhalaj niiqui, ančhucqui zuma kamañquiztan tsjii kjutñi chjichtaž cjesačha. ³⁴Ančhucqui zuma lijitum razunanacchiz cjisna; nižaza lijituma cjee; anaž uj paa. Yekjap ančhucqui Yooz puntunaca ana zuma zizza. Jalla nii ančhucquiz chiižinučha, ančhuc azajo.

JACATATCHI ŽOÑINACŽ CURPU PUNTU

³⁵Cunamit tsjii žoñiqui pewcznačhan, tuž cjican: “¿Jaknužt ticzi žoñinaca jacatataquejo? ¿Čhjuluz cherchi curpuchiz cjequejo?” ³⁶Zumzu pewczñi pewczičha. Semilla čhjaczcu, nii čhjacta semillaqui ana katchi cjequiz niiqui, ew zkala ana jecznasacha. ³⁷Nii čhjacta semillaqui anaž ew zkalapacha cjesačha. Nii čhjacta semillaqui semillakazza, trigo cjenami, yekja cjenami, semillakazza, anaž ew zkalapacha cjesačha. ³⁸Semilla čhjactiquiztan jaknužt Yoozqui munčhaja, jalla nižta ew zkala ulanskatcha. Čhjacta semillquiztan jama, punta puntaž ew

zkala ulanča. Tjapa zkalanacaqui anača tsjiikaz. Punta punta žejlča. ³⁹Jalla niža iratača tii muntuquiz žejlči curpuqui. Žoñinacž curpuqui yekjača. Ch'iznacž curpuqui yekjača. ⁴⁰Nižaza arajpachquin žejlñinacž curpuqui yekjača. Nižaza yokquiz žejlñinacž curpuqui yekjača. Arajpach curpuqui tsjemata cheechi tježa yokquiz žejlči curpuquiztan.

⁴¹Tjuñ kjanaqui tsjematača jiiž kjanquiztan. Nižaza tsjematazakazza warawarž kjanquiztan. Nižaza tsjii warawarž kjanaqui tsjematazakazza yekja warawarž kjanquiztanaqui.

⁴²Jalla niža iratača jacatatžqui. Ticzi curpuqui tsjematača jacatatchi curpuquiztan. Nii ticzi curpuqui tjatža, nižazaž mojkča. Nii jacatatchi curpuzti ana ticznasača, nižaza ana mokasača. ⁴³Nii ticzi curpuqui ana honorchizza. Nii jacatatchi curpuzti zuma honorchizza. Nii ticzi curpuqui ana azzizza. Jacatatchi curpuzti walja azzizza. ⁴⁴Nižaza ticzuca curpuqui tii muntuquiz kamzjapa curpukazza. Jacatatchi curpuqui tsjematača, wiñaya kamzjapa. Tii muntuquiz kamcan, žoñinacaqui curpuchizza. Niža zakaz jacatatžcu curpuchiz zakaz cjequiča, wiñaya kamzjapa.

⁴⁵Cjijrta Yooz takuqui tuž cjiča: “Tuquita žoñiqui Adán cjitatača, nižaza žejtñi curpuchiztača, tjapa niž majch maatinacžtajapaqui”. Cristuqui Adanžtapachazakazza. Jalla niiqui wiñaya žetiž tjaača, tjapa nižquin criichi žoñinacžtajapaqui. Yooztan kamz, jalla niča wiñaya žetiqui. ⁴⁶Tii muntuquiz žoñinacaqui kamča žejtñi curpuchiz. Wiruñauqui jacatatžcuqui žoñinacaqui wiñaya žejtñi curpuchiz cjequiča. ⁴⁷Tuquita žoñiqui yok pjilquiztan paatača. Wiruñta žoñiqui, Jesucristo Jiliriqui,

arajpachquiztan tjonchiča. ⁴⁸Tii yokquiz kamñi žoñinacž curpuqui Adanž curpu iratača. Nižaza Yooztan arajpachquin kamñi criichinacž curpuqui Jesucristuž jacatatchi curpu iratača. ⁴⁹Učumnacaqui Adán irata curpuchizza. Pero jacatatžcu Jesucristo irata kamaquiča, ew curpuchiz.

⁵⁰Jilanaca, cullaquinaca, jalla tii puntu tjajnuča, ančucaquiz zizkatžjapa. Janchichiz nižaza ljokchiz curpuqui arajpach wajtquin ana luzasača. Nižaza tii mojkñi curpuqui anaž wiñaya žetasača arajpachquin. ⁵¹Tsjii zakaz ančucaquiz zizkatž pecuča. Tjapa criichinacaqui anaž ticznaquiča. Pero tsjii ratullakaz curpunacaqui campiižintaž cjequiča.

⁵²Tsjii čhujqui jaknužt ch'ipquinižlaja, jalla nuž tsjii ratulla curpu campiižintaž cjequiča. Arajpach anjilaž trompeta tjawžtan, curpunacaqui campiižintaž cjequiča. Nii trompeta tjawžtan, ticzi žoñinacaqui jacatatskattaž cjequiča, ana iya ticzjapa. Nižaza žejtñi žoñinacž curpunacazakaz campiižintaž cjequiča. ⁵³Tii yokquiz žejlči curpuqui anaž wiñaya tjurni cjesača. Jalla nižtiquiztan učumqui ew curpuž tanstanča wiñaya žejtžjapa. Nižaza učum ticzñi curpuqui anaž wiñaya tjurni cjesača. Jalla nižtiquiztan učumqui ana ticzñi curpu tanstanča.

⁵⁴Učumnacaqui ew wiñaya žejtñi curpuchiz cjequiča, nižaza ana ticzñi curpuchiz. Jalla nuž wattan Yooz takuqui cumplissi cjequiča. Yooz takuqui tuž cjiča: “Ticzqui atipžtaž cjequiča. Jalla nižtiquiztan ana iya ticz želaquiča. ⁵⁵Nižaza ticzqui anapanž iya atipaquiča”. Ticzqui anaž iya žoñinacžquiz llaquita cjiskataquiča. ⁵⁶Ujchiz cjen ticz žejlča. Nižaza ticzqui žoñinacžquiz llaquita cjiskatča. Nižaza tuquita

cijjrta liiqui žoñinacžquin persun ujnaca tjeeža. ⁵⁷Wejrqui Yoozquin ancha gracias cjican tjaa-učha. Jesucristo Jilirž cjen učumqui ticzquiztan atipaquičha.

⁵⁸Jalla nižtiquiztan, weriž pecta jilanaca, Yoozquin tjurt'iñi kuzziz cjee, nižaza Yoozquin tjup kuzziz cjee, nižaza Jesucristo Jilirž tjaata kamañquin juc'anti juc'anti kuz tjaa. Ančhucqui zizza, Jesucristo Jiliržtajapa langzqui anačha inaquí.

CRIICHINACŽTAJAPA PAAZ JUNTIZ PUNTU

16 ¹Tsjii zakal chiižinučha, criichinacžtajapa paaz juntiz puntuquiztan. Jaknužt Galacia provinciquin wejrqui tjapa iclizziz žoñinacžquiz chiižinchinčhalaja, jalla nižta irata ančhucaquiz chiižinučha, paaz juntantiz waquizičha, pori criichinacžquiz yanapzjapa, jalla nii. ²Zapa siman tumincuqui ančhucqui ančhucaž cantiquiztan jama t'akz waquizičha. Jalla nuž t'akžcu chjojwaquičha wejt tjonzcama. Nekztan weriž tjonan, ana žoñ žoñžquiztan apura ojklaycan paaz juntantichuca. Ančhucaž t'akzta paazqui listupachakaz cjequičha. ³Nižaza ančhucqui tsjii kjaž jilanaca illz waquizičha, nii juntantita paaz chjichñijapa Jerusalén wajtchiz criichinacžquiz. Nižaza ančhucqui nii illzta jilanacžquiz tsjii carta credencialž tjaauičha. Nekztanaqui wejr tjonžcu, wejrpachal ninaca cuchanžcačha Jerusalén watja. ⁴Wejr ojkučha cjequičha niiqui wejttan chicaž okaquičha ninacaqui.

TSJII KJAŽT PUNTUNACA

⁵Ima tjoncan, wejrqui Macedonia yokaran ojklayasaj cjiwčha. Wiruñaquí

Corinto irantasaj cjiwčha, ančhucaquiz tjonzjapa. ⁶Irantižcu tsjii kjaž maj kamačhan, uz cunamit nicju sac timpu watačhani. Nekztanaqui ančhucqui wejt ojklayzjapa yanapasačha, jakzi ojcz cjenami, jalla nii. ⁷Wejrqui tsjii upacama watcankaz ana tjonz pecučha. Antiz tsjii kjaž maj ančhucatan kamz pecučha, Yooz Jilirž munan. ⁸Pero Efes wajtquin kamačha Pentecostes tjuñicama. ⁹Tii Efes wajtquiz ancha Yooztajapa langz žejlčha. Nižaza zumpachapan langznan, walja žoñinacaqui criyačhani. Nižaza walja Yooztajapa langžni quintra žoñinaca žejlčha.

¹⁰Timoteož irantižquitan, ančhucqui Timoteož kuz cuntintupanž cjiskataquičha. Niiqui Yooz Jiliržtajapa langža, wejr irata. ¹¹Jalla nižtiquiztan anaž jecmi ančhucaquiztan nii Timoteo iñarasačha. Antiz ančhucqui juc'antiž yanapaquičha, nii zuma cuntintu tira ojklayajo. Nižaza nii yanapaquičha, wejr chertzni quejpžcajo. Tekzi wejrqui Timoteo tjewznučha parti criichi jilanacžtan.

¹²Apolos jilž puntuquiztan tiil maznučha. Wejrqui ancha nižquiz rocchinčha, yekjap jilanacžquiz cumpañt'ajo, ančhucaquin chertzni. Parti jilanacžtan ojcz cjen Apoluqui ana okawk cjichičha. Wiruñ niiqui ančhuc chertzni okačhani, atchucaž cjen.

¹³Ančhucqui persun kamaña cwitaza. Yoozquin tjurt'iñi kuzziz cjee. Yooz aztan tjup kuzziz cjee. ¹⁴Čhulu paacanami zuma munaziñi kuzziz cjee.

¹⁵Jilanaca, cullaquinaca, ančhucqui zizza. Acaya yokquiz Estefanasqui niž jamillanacžtanpacha primira Yoozquin criichičha. Nekztanaqui ninacaqui parti criichi jilanacžquiz yanapzjapa kuz tjaachičha. ¹⁶Jalla nižta kuzziz

žoñinacž tawk jaru kama. Nižaza tjapa nižta criichinacžquiz yanapñinacami, nižaza Yooztajapa langzñinacami rispitaquiča. Nižaza ninacž tawk jaru kama. ¹⁷Estefanastan Fortunatžtan Acaicužtan jalla ninacaž tjontan, walja cuntintutača wejrqui. Ančhucaž ana wejttañž žejlchucaž cjen, ninacača ančhuc cuntiquiztan wejr yanapchiqui. ¹⁸Wejttañ kamcan ninacaqui wejt kuzquiz amtaychiča, jaknužt ančhuca kuzquiz amtayčhaja, jalla nižta. Nižta žoñinacaqui, rispittaj cjila.

¹⁹Asia provinciquin žejlñi jilanacaqui ančhucaquin tsaanzquiča. Aquilžtan Priscilatan, nižaza ninacž kjuyquiz ajczñi jilanacžtan, jalla tjapa ninacaqui

ančhuc criichinacžquin tsaanzquiča, Jesucristo Jilirž tjuuquiz. ²⁰Nižaza tjapa criichi jilanacaqui ančhucaquin tsaanzquiča. Nižaza ančhucaquiz porapat zuma kuztan tsaanassnaquiča.

²¹Wejrqui Pablutča. Persun kjaržtan tii weriž tsaanta litraqui cjiiruča.

²²Jakziltat Jesucristo Jiliržquin ana kuzziz cječhaja, nižaza quintra cječhaja, jalla niiqui anawalquiz uchtaž cjequiča. iUčhum Jesucristo Jiliri urej tjonla!

²³⁻²⁴Nižaza Jesucristo Jiliri qui ančhucaquiz zuma yanapt'ila. Nižaza wejrqui tjapa ančhucaquin k'ayichuča Jesucristuž cjen. Jalla nužoj cjila. Amén.